

李文公集

李翱

文硕阁

wenshuoge.com

目录

关于我们	3
提要	5
卷一	7
卷二	9
卷三	12
卷四	15
卷五	18
卷六	21
卷七	24
卷八	27
卷九	31
卷十	34
卷十一	38
卷十二	42
卷十三	45
卷十四	48
卷十五	52
卷十六	55
卷十七	59
卷十八	62

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望能有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

提要

钦定四库全书 集部二

李文公集 别集类一【唐】

提要

【臣】等谨案李文公集十八卷唐李翱撰翱字习之陇西成纪人凉武昭王暕之裔也贞元十四年进士官至山南东道节度使检校户部尚书事蹟具唐书本传其集唐艺文志作十八卷赵汭东山存稿有书後一篇称李文公集十有八卷百四篇江浙行省参政赵郡苏公所藏本与唐志合陈振孙书录解题则云蜀本分二十卷近时凡有二本一为明景泰间河东邢让抄本

国朝徐养元刻之讹舛最甚此本为毛晋所刊仍十八卷或即苏天爵家本欵考阎若璩潜邱劄记有与戴唐器书曰特假旧唐书参考李浙东不知何名或李翱习之全集出尚得其人然老矣倦于寻访矣云云则似尚不以为足本不知何所据也翱为韩愈之侄婿故其学皆出於愈集中载答皇甫湜书自称高愍女杨烈妇传不在班固蔡邕下其自许稍过然观与梁载言书论文甚详至寄从弟正辞书谓人号文章为一艺者乃时世所好之文其能到古人者则仁义之词恶得以一艺名之故才与学虽皆逊愈不能熔铸百氏皆如己出而立言具有根柢大抵温厚和平俯仰中度不似李观刘蛻诸人有矜心作意之态苏舜钦谓其词不逮韩而理过於柳诚为笃论郑獬谓其尚质而少工则贬之太甚矣集不知何人所编观其有与侯高第二书而无第一书知其去取之间特为精审惟集中皇祖实录一篇立名颇为僭越夫皇祖皇考文见礼经至明英宗时始着为禁令翱在其前称之犹有说也若实录之名则六代以来已定为帝制隋志所载班班可稽唐宋以来臣庶无敢称者翱乃以题其祖之行状殊为不经編集者无所刊正则失所别裁矣陈振孙谓集中无诗独载戏赠一篇拙甚叶适亦谓其不长於诗故集中无传惟传灯录载其赠药山僧一篇韩退之远游联句记其一联振孙所谓有一诗者盖蜀本适所谓不载诗者盖即此本毛晋跋谓迩来抄本始附戏赠一篇盖未详考振孙语也然传灯录一诗得於郑州石刻刘敞中山诗话云唐李习之不能诗郑州掘石刻有郑州刺史李翱诗云云此别一李翱非习之唐书习之传不记为郑州王深甫编习之集乃收此诗为不可晓苕溪渔隐丛话所论亦同惟王楙野客丛书独据僧录叙翱仕履断其实尝知郑州诸人未考考开元寺僧尝请翱为钟铭翱答以书曰翱学圣人之心焉则不敢逊乎知圣人之道者也吾之铭是钟也吾将明圣人之道焉则於释氏无益吾将顺释氏之教而述焉则给乎下之人甚矣何贵乎吾之先觉也观其书语岂肯向药山问道者此不刻亦如韩愈大颠三书因其素不信佛而緇徒务欲言其皈依用彰彼教耳楙乃以翱尝为郑州信之是知其一不知其二也至金山志载翱五言律诗一篇全剿五代孙鲂作则尤近人所托不足与辨宋叶石林诗话曰人之才力有限李翱皇甫湜皆韩退之高弟而二人独不传其诗不应散亡无一篇存者计或非其所长故不作耳二人以非所长而不作贤於世之不能而强为之者也斯言允矣乾隆四十六年十月恭校上

总纂官【臣】纪昀【臣】陆锡熊【臣】孙士毅

总校官【臣】陆费墀

卷一

钦定四库全书

李文公集卷一

唐 李翱 撰

感知己赋【并序】

贞元九年翱始就州府之贡举人事其九月执文章一通谒于右补阙安定梁君是时梁君之誉塞天下属词求进之士奉文章造梁君门下者盖无虚日梁君知人之过也亦既相见遂於翱有相知之道焉谓翱得古人之遗风期翱之名不朽於无穷许翱以拂拭吹嘘翱初谓面相进也亦未幸甚十一月梁君遘疾而歿翱游於朋友公卿间往往皆曰吾久籍子姓名於补阙梁君也翱乃知非面相进也当时意谓先进者遇人特达皆合有是心亦未谓知己之难得也梁君歿於兹五年翱学圣人经籍教训文句之旨而为文将数万言愈昔年见于梁君之文弗啻数倍虽不敢同德於古人然亦常无忤於中心每岁试於礼部连以文章罢黜声光晦昧於时俗人皆谓之固宜矣然後知先进者遇人特达亦不皆有是心方知知己之难得也夫见善而不能知虽善何为知而不能誉则如勿知誉而不能深则如勿誉深而不能久则如勿深久而不能终则如勿久翱虽不肖幸辱於梁君所知君为之言於人岂非誉欤谓其有古人之遗风岂非深欤誉而逮夫终身岂非久欤不幸梁君短命遽歿是以翱未能有成也其谁能相继梁君之志而成之欤已焉哉天之遽丧梁君也是使翱之命久迍邅厄穷也遂赋感知己以自伤其言怨而不乱盖小雅骚人之余风也其辞曰

戚戚之愁苦兮思释去之无端彼衆人之容易兮乃志士之所难伊自古皆嗟兮又何怨乎兹之世独厄穷而不达兮悼知音之永逝纷予生之多故兮愧特于世之谁知抚圣人教化之旨兮询合古而乖时诚自负其中心兮嗟与俗而相违趋一名之五稔兮尚无成而淹此路岐昔圣贤之遑遑兮极屈辱之驱驰择中庸之蹈难兮虽困顿而终不改其所为苟天地之无私兮曷不鉴照於神祇心劲直於松柏兮沦霜雪而不衰知我者忽然逝兮岂吾道之已而

幽怀赋【并序】

朋友有相叹者赋幽怀以答之其辞曰

衆囂囂而杂处兮咸嗟老而羞卑视予心之不然兮虑行道之犹非悦中怀之自得兮终老死其何悲昔孔门之多贤兮惟回也为庶几超羣情以独去兮指圣域而高追固簞食与瓢饮兮宁服轻而驾肥望若人其何如兮慙吾德之纖微躬不田而饱食兮妻不织而丰衣援圣贤而比度兮何侥幸之能希念所怀之未展兮非悼已而陈私自禄山之始兵兮岁周甲而未夷何神尧之郡县兮乃家传而自持税生人而育卒兮列高城以相维何兹世之可久兮宜永念而

遐思有三苗之逆命兮舞干羽以来之惟刑德之既修兮无遐迹而咸归当高祖之初起兮提一旅之羸师能顺天而用衆兮竟扫寇而戡随况天子之神明兮有烈祖之前规划弊政而还本兮如反掌之易为苟庙堂之治得兮何下邑之能违哀子生之贱远兮包深怀而告谁嗟此诚之不达兮惜此道而无遗独中夜以潜叹兮匪吾忧之所宜

释怀赋【并序】

读党锢传哀直道之多尤不容作释怀赋其辞曰怀夫人之郁郁兮历悔吝而不离吾心直以无差兮惟上天之能知邪何德而必好兮忠何尤而被疑彼陈辞之多人兮胡不去衆而讯之进荅言而不信兮退远去而不获弗验实而考省兮固予道之所厄昔师商之?圣兮德既均而行革惟肝肠之有殊兮守不同其何责愿披怀而竭闻兮道既塞而已行路非险而不通兮人忌我而异情王章直而狱死兮李固忠而陷刑自古世之所悲兮矧末俗之哀诚哀贞心之洁白兮疾苗莠之纷生令农夫以手鋤兮反翦去乎嘉茎岂不指稂而语之兮佯瞪瞠而不肯听叹释去而不忍兮终留滞亦何成当晨旦而步立兮仰白日而自明处一世而若流兮何久永而伤情乐此言而内抑兮壮大观於庄生拔馨香之菡兰兮树蒿蔚以罗列斥通道而使芜兮恋棘径之中絶置春秋而询心兮羌与此其奚别昔担词而约交兮期共死而皆居嗟所守之既异兮乃汗漫而遗初心皓白而不容兮非市直而望利忠不顾而立忘兮交不同而行弃悲夫不徇已而必仇兮谅非水火其何畏独吾行之不然兮直愧心而惧义嘉山松之苍苍兮岁苦寒而亦悴吾固乐其贞刚兮夫何尤乎小异欲静默而絶声兮岂不悼厥初之所志抑此怀而不可兮终永夜以嘘唏

李文公集卷一

卷二

钦定四库全书

李文公集卷二

唐 李翱 撰

复性书上

人之所以为圣人者性也人之所以惑其性者情也喜怒哀惧爱恶欲七者皆情之所为也情既昏性斯匿矣非性之过也七者循环而交来故性不能充也水之浑也其流不清火之烟也其光不明非水火清明之过沙不浑流斯清矣烟不郁光斯明矣情不作性斯充矣性与情不相无也虽然无性则情无所生矣是情由性而生情不自情因性而情性不自性由情以明性者天之命也圣人得之而不惑者也情者性之动也百姓溺之而不能知其本者也圣人者岂其无情邪圣人者寂然不动不往而到不言而神不耀而光制作参乎天地变化合乎阴阳虽有情也未尝有情也然则百姓者岂其无性者邪百姓之性与圣人之性弗差也虽然情之所昏交相攻伐未始有穷故虽终身而不自覩其性焉火之潜于山石林木之中非不火也江河淮济之未流而潜于山非不泉也石不敲木不磨则不能烧其山林而燥万物泉之源弗疏则不能为江为河为淮为济东滙大壑浩浩荡荡为弗测之深情之动弗息则不能复其性而烛天地为不极之明故圣人者人之先觉者也觉则明否则惑惑则昏明与昏谓之不同明与昏性本无有则同与不同二者离矣夫明者所以对昏昏既灭则明亦不立矣是故诚者圣人性之也寂然不动广大清明照乎天地感而遂通天下之故行止语默无不处于极也复其性者贤人循之而不已者也不已则能归其源矣易曰夫圣人者与天地合其德日月合其明四时合其序鬼神合其吉凶先天而天弗违后天而奉天时天且弗违而况于人乎况于鬼神乎此非自外得者也能尽其性而已矣子思曰唯天下至诚为能尽其性能尽其性则能尽人之性能尽人之性则能尽物之性能尽物之性则可以赞天地之化育可以赞天地之化育则可以与天地参矣其次致曲曲能有诚诚则形形则着着则明明则动动则变变则化唯天下至诚为能化圣人知人之性皆善可以循之不息而至于圣也故制礼以节之作乐以和之安於和乐乐之本也动而中礼礼之本也故在车则闻鸾和之声行步则闻佩玉之音无故不废琴瑟视听言行循礼而动所以教人忘嗜欲而归性命之道也道者至诚也诚而不息则虚虚而不息则明明而不息则照天地而无遗非他也此尽性命之道也哀哉人皆可以及乎此莫之止而不为也不亦惑邪昔者圣人以之传于颜子颜子得之拳拳不失不远而复其心三月不违仁子曰回也其庶乎屡空其所以未到於圣人者一息耳非力不能也短命而死故也其余升堂者盖皆传也一气之所养一雨之所膏而得之者各有浅深不必均也子路之死也石乞壶黶以戈击之断缨子路曰君子死冠不免结缨而死由也非好勇而无惧也其心寂然不动故也曾子之死也曰吾何求哉吾得正而毙焉斯已矣此正性命之言也子思仲尼之孙得其祖之道述中庸四十七篇以传于孟轲轲曰我四十不动心轲之门人達者公孙丑万章之徒盖传之矣遭秦灭书中庸之不灭者一篇存焉於是此道废阙其教授者唯节行文章章句威仪

擊劍之術相師焉性命之源則吾弗能知其所傳矣道之極于剥也必復吾豈復之時邪吾自六歲讀書但為詞句之學志於道者四年矣與人言之未嘗有是我者也南觀濤江入於越而吳郡陸儔存焉與之言之陸儔曰子之言尼父之心也東方如有聖人焉不出乎此也南方如有聖人焉亦不出乎此也惟子行之不息而已矣嗚呼性命之書雖存學者莫能明是故皆入於莊列老釋不知者謂夫子之徒不足以窮性命之道信之者皆是也有問於我我以吾之所知而傳焉遂書于書以開誠明之源而缺絕廢棄不揚之道凡可以傳于時命曰復性書以理其心以傳乎其人烏戲夫子復生不廢吾言矣

復性書中

或問曰人之昏也久矣將復其性者必有漸也敢問其方曰弗慮弗思情則不生情既不生乃為正思正思者無慮無思也易曰天下何思何慮又曰閑邪存其誠詩曰思无邪曰已矣乎曰未也此齋戒其心者也猶未離於靜焉有靜必有動有動必有靜動靜不息是乃情也易曰吉凶悔吝生乎動者也焉能復其性邪曰如之何曰方靜之時知心無思者是齋戒也知本無有思動靜皆離寂然不動者是至誠也中庸曰誠則明矣易曰天下之動貞夫一者也問曰不慮不思之時物格於外情應於內如之何而可止也以情止情其可乎曰情者性之邪也知其為邪邪本無有心寂不動邪思自息惟性明照邪何所生如以情止情是乃大情也情互相止其有已乎易曰顏氏之子有不善未嘗不知知之未嘗復行也易曰不遠復無只悔元吉問曰本無有思動靜皆離然則聲之來也其不聞乎物之形也其不見乎曰不覩不聞是非人也視听昭昭而不起於见闻者斯可矣無不知也無弗為也其心寂然光照天地是誠之明也大學曰致知在格物易曰易無思也無為也寂然不動感而遂通天下之故非天下之至神其孰能與於此曰敢問致知在格物何謂也曰物者萬物也格者來也至也物至之時其心昭昭然明辨焉而不应於物者是致知也是知之至也知至故意誠意誠故心正心正故身修身修而家齊家齊而國治國治而天下平此所以能參天地者也易曰與天地相似故不違知周乎萬物而道濟天下故不過旁行而不流乐天知命故不憂安土敦乎仁故能愛範圍天地之化而不過曲成萬物而不遺通乎晝夜之道而知故神無方而易無體一陰一陽之謂道此之謂也曰生為我說中庸曰不出乎前矣曰我未明也敢問何謂天命之謂性曰人生而靜天之性也性者天之命也率性之謂道何謂也曰率循也循其源而反其性者道也道也者至誠也至誠者天之道也誠者定也不動也修道之謂教何謂也曰誠之者人之道也誠之者擇善而固執之者也修是道而歸其本者明也教也者則可以教天下矣顏子其人也道也者不可須臾離也可離非道也說者曰其心不可須臾動焉故也動則遠矣非道也變化無方未始離於不動故也是故君子戒慎乎其所不覩恐懼乎其所不聞莫見乎隱莫顯乎微故君子慎其獨也說者曰不覩之覩見莫大焉不聞之聞聞莫甚焉其心一動是不覩之覩不聞之聞也其復之也遠矣故君子慎其獨慎其獨者守其中也問曰昔之注解中庸者與生之言皆不同何也曰彼以事解者也我以心通者也曰彼亦通於心乎曰吾不知也曰如生之言修之一日則可以至於聖人乎曰十年擾之一日止之而求至焉是孟子所謂以杯水而救一車薪之火也甚哉止而不息必誠誠而不息必明明與誠終歲不違則能終身矣造次必於是顛沛必於是則可以希於至矣故中庸曰至誠無息不息則久久則徵徵則悠遠悠遠則博厚博厚則高明博厚所以載物也高明所以覆物也悠久所以成物也博厚配地高明配天悠久無疆如此者不見而章不動而

变无为而成天地之道可一言而尽也问曰凡人之性犹圣人之性故曰桀纣之性犹尧舜之性也其所以不覩其性者嗜欲好恶之所昏也非性之罪也曰为不善者非性邪曰非也乃情所为也情有善有不善而性无不善焉孟子曰人无有不善水无有不下夫水搏而跃之可使过颍激而行之可使在山是岂水之性哉其所以导引之者然也人之性皆善其不善亦犹是也问曰尧舜岂不有情邪曰圣人至诚而已矣尧舜之举十六相非喜也流共工放驩兜殛鲧窜三苗非怒也中於节而已矣其所以皆中节者设教于天下故也易曰知变化之道者其知神之所为乎中庸曰喜怒哀乐之未发谓之中发而皆中节谓之和中也者天下之大本也和也者天下之达道也致中和天地位焉万物育焉易曰唯深也故能通天下之志唯几也故能成天下之务唯神也故不疾而速不行而至圣人之谓也问曰人之性犹圣人之性嗜欲爱憎之心何因而生也曰情者妄也邪也邪与妄则无所因矣妄情灭息本性清明周流六虚所以谓之能复其性也易曰乾道变化各正性命论语曰朝闻道夕死可矣能正性命故也问曰情之所昏性即灭矣何以谓之犹圣人之性也曰水之性清澈其浑之者沙泥也方其浑也性岂遂无有邪久而不动沙泥自沉清明之性鉴於天地非自外来也故其浑也性本弗失及其复也性亦不生人之性亦犹水也问曰人之性本皆善而邪情昏焉敢问圣人之性将复为嗜欲所浑乎曰不复浑矣情本邪也妄也邪妄无人不能复圣人既复其性矣知情之为邪邪既为明所觉矣觉则无邪邪何由生也伊尹曰天之道以先知觉後知先觉觉後觉者也予将以此道觉此民也非予觉之而谁也如将复为嗜欲所浑是尚不自觉地也而况能觉後人乎曰敢问死何所之耶曰圣人之所不明书於策者也易曰原始反终故知死生之说精气为物游魂为变是故知鬼神之情状斯尽之矣子曰未知生焉知死然则原其始而反其终则可以尽其生之道生之道既尽则死之说不学而自通矣此非所急也子修之不息其自知之吾不可以章章然言且书矣

复性书下

昼而作夕而休者凡人也作乎作者与万物皆作休乎休者与万物皆休吾则不类於凡人昼无所作夕无所休作非吾作也作有物休非吾休也休有物作耶休耶二者离而不存予之所存者终不亡且离也人之不力於道者昏不思也天地之间万物生焉人之於万物一物也其所以异於禽兽虫鱼者岂非道德之性乎哉受一气以成其形一为物而一为人得之甚难也生乎世又非深长之年也以非深长之年行甚难得之身而不专专於大道肆其心之所为则其所以自异於禽兽虫鱼者亡几矣昏而不思其昏也终不明矣吾之生二十有九年矣思十九年时如朝日也思九年时亦如朝日也人之受命其长者不过七十八九十年百年者则稀矣当百年之时而视乎九年时也与吾此日之思於前也远近其能大相悬耶其又能远於朝日之时耶然则人之生也虽享百年若雷电之惊相激也若风之飘而旋也可知耳矣况千百人而无一及百年者哉故吾之终日志於道德犹惧未及也彼肆其心之所为者独何人耶

李文公集卷二

卷三

钦定四库全书

李文公集卷三

唐 李翱 撰

平赋书【并序】

孔子曰道千乘之国敬事而信节用而爱人使民以时又曰若欲行而法则周公之典在孟子曰夏后氏五十而贡殷人七十而助周人百亩而彻其实皆什一也欲轻之於尧舜之道大貉小貉也欲重之於尧舜之道大桀小桀也是以什一之道公私皆足人既富然後可以服教化反淳朴古之圣贤未有不善於为政理人而能光于後代者也故善为政者莫大於理人理人者莫大於既富之又教之凡人之情莫不欲富足而恶贫穷终岁不制衣则寒一日不得食则饥四民之苦者莫甚於农人麦粟布帛农人之所生也岁大丰农人犹不能足衣食如有水旱之灾则农人先受其害有若曰百姓不足君孰与足夫如是百姓之视其长上如仇讐安既不得享其利危又焉肯尽其力自古之所以危亡未有不由此者也人皆知重歛之为可以得财而不知轻歛之得财愈多也何也重歛则人贫人贫则流者不归而天下之人不来由是土地虽大有荒而不耕者虽耕之而地力有所遗人日益困财日益匮是谓弃天之时遗地之利竭人之财如此者虽欲为社稷之臣建不朽之功诛暴逆而威四夷徒有其心岂可得耶故轻歛则人乐其生人乐其生则居者不流而流者日来居者不流而流者日来则土地无荒桑柘日繁尽力耕之地有余利人日益富兵日益强四邻之人归之如父母虽欲驱而去之其可得耶是以与之安而居则富而可教与之危而守则人皆自固孟轲所谓率其子弟攻其父母自生民以来未有能济者也呜呼仁义之道章章然如大道焉人莫不知之然皆不能行何也见之有所未尽而又有嗜欲以害之其自任太多而任人太寡是以有土地者有仁义无代无之虽莫不知之然而未有一人能行之而功及後代者由此道也秦灭古法隳井田而夏殷周之道废相承滋久不可卒复翱是以取可行於当时者为平赋书而什一之法存焉庶几乎能有行之者云尔

凡为天下者视千里之都为千里之都者视百里之州为百里之州者起於一亩之田五尺谓之步【古者六尺为步古之尺小为兹时之尺四尺八寸则方一步为古之方一步余三百六寸二分五厘也】二百有四十步谓之亩【古者步百为亩与此时不同而从俗之数则易行也一亩为古之田三亩也】三百有六十步谓之里【古者亩百为夫夫三为屋屋三为井一井之田九夫三屋方三百步为一里也方一里之田九夫顷异名也】方里之田五百有四十亩【亩百为顷五顷四十亩也古之里虽小其亩又加小所以古之方一里为田九顷兹时方一里为田五顷四十亩为古之田十六顷有二十亩也】十里之田五万有四千亩【五百四十顷也为古之田一千六百二十顷也】百里之州五千有四亿亩【五万四千顷也为古之田一十六万二千顷也】千里之都五千有四百亿亩【五百四十万顷也为古田一千六百

二十万顷也】方里之内以十亩为之屋室径路牛豚之所息葱韭菜蔬之所生植里之家给焉【古者方一里为井为田九百亩农夫八家各受百亩公田八十亩八家同养公田公事毕然後理私田诗曰雨我公田遂及我私余田二十亩为间井屋室兹时既加大一亩之田为古之田三亩十亩之田为古之田三十亩按其多少亦相若矣】凡百里之州为方十里者百州县城郭之所建通川大途之所更丘墓乡井之所聚畊遂沟洫之所渠大计不过方十里者三十有六有田一十九亿四万有四千亩【一万九千四百四十顷也】百里之家给焉千里亦如之高山大川则郭其中斩长缀短而量之一亩之田以强并弱水旱之不时虽不能尽地力者岁不下粟一石公索其十之一凡百里之州有田五十有四亿亩以一十九亿四万有四千亩为之州县城郭通川大途畊遂沟洫丘墓乡井屋室径路牛豚之所息葱韭菜蔬之所生植余田三十四亿五万有六千亩【三万四千五百六十顷也】亩率十取粟一石为粟三十四万五千有六百石以贡於天子以给州县凡执事者之禄以供宾客以输四方以御水旱之灾皆足於是矣其田间树之以桑凡树桑人一日之所休者谓之功桑太寡则乏于帛太多则暴于田是故十亩之田植桑五功一功之蚕取不宜岁度之虽不能尽其功者功不下一匹帛公索其百之十凡百里之州有田五十四亿亩以十九亿四万有四千亩为之州县城郭通川大途畊遂沟洫丘墓乡井屋室径路牛豚之所息葱韭菜蔬之所生植余田三十四亿五万有六千亩麦之田大计三分当其一其土卑不可以植桑余田二十三亿有四千亩树桑凡一百一十五万有二千功功率十取一匹帛为帛一十一万五千有二百匹以贡於天子以给州县凡执事者之禄以供宾客以问四方以御水旱之灾皆足於是矣鰥寡孤独有不人疾者公与之粟帛能自给者弗征其田桑凡十里之乡为之公困焉乡之所入于公者岁十舍其一於公困十岁得粟三千四百五十有六石十里之乡多人者不足千六百家乡之家保公困使勿偷饥岁并人不足於食量家之口多寡出公困与之而劝之种以须麦之升焉及其大丰乡之正告乡之人归公所与之畜当戒必精勿濡以内於公困穷人不能归者与之勿徵于书则岁虽大饥百姓不困于食不死于沟洫不流而入於他矣人既富乐其生重犯法而易为善教其父母使之慈教其子弟使之孝教其在乡党使之敬让羸老者得其安幼弱者得其养鰥寡孤独有不人疾者皆乐其生屋宇相邻烟火相接於百里之内与之居则乐而有礼与之守则人皆固其业虽有强暴之兵不敢陵自百里之内推而布之千里自千里而被乎四海其孰能当之是故善为政者百姓各自保而亲其君上虽欲危亡弗可得也其在诗曰迨天之未阴雨彻彼桑土绸繆牖户今此下民或敢侮予此之谓也

进士策问第一道

问初定两税时钱直卑而粟帛贵粟一斗价盈百帛一匹价盈二千税户之岁供千百者不过粟五十石帛二十余匹而充矣故国用皆足而百姓未以为病其法弗更及兹三十年百姓土田为有力者所并三分踰一其初矣其输钱数如故钱直日高粟帛日卑粟一斗价不出二十帛一匹价不出八百税户之岁供千百者粟至二百石帛至八十匹然後可足是为钱数不加而其税以一为四百姓日蹙而散为商以游十三四矣四年春天子哀之诏天下守土臣定留州使额钱其正料米如故其余估高下如上供百姓赖以比两税之初轻重犹未相似有何术可使国用富而百姓不虚游人尽归於农而皆乐有力所并者税之如户而士兵不怨夫岂无策而臻於是耶吾子盍悉怀以来告

又第二道

问土蕃之为中国忧也久矣和亲赂遗之皆不足以来好息师信其甘言而与之诅盟耶於是深怀阴邪乘我之去而欺神虐人系虏卿士大夫至兹为羞备御之耶则暴天下数十万之兵或悲号其父母妻子且烦馈餼衣食之劳百姓以虚弗备御之耶必将伺我之间攻陷城池掠玉帛子女杀其老弱系累其丁壮以归自古帝王岂无诛土蕃之成策邪何边境未安若斯之甚邪二三子其将亦有说乎

李文公集卷三

卷四

钦定四库全书

李文公集卷四

唐 李翱 撰

从道论

中才之人拘於书而惑於衆传言违衆不祥书曰三人占则从二人之言翱以为言出於内则可守而为常则中人之惑者多矣何者君子从乎道也不从乎衆也道之公余将是之岂知天下党然而非之道之私余将非之岂知天下警然而非之将是之岂图是之之利乎将非之岂图非之之害乎故大道可存是非可常也小人则不然将是之先攫其利己将非之先怖其害已然则远害者心是而非之眩利者心非而是之故大道丧是非汨人伦坏邪说胜庸可使衆言必听衆违必从之耶且夫天下蚩蚩知道者几何人哉使天下皆贤人则从衆可也使天下贤人二小人三其可以从乎况贪人以利从则富者之言胜柔人以生从则威者之言胜中人以名从则狷者之言胜而君子之处衆则谆谆然如愚怡然如卑当言而默者三游同而器异则默待近而责远则默事及而时未则默小人俱不然所以君子慎言而小人饰言君子俟时而小人徇时也然则君子默於衆小人默於独皆事势牵之岂心愿耶学而从之者得以择之矣呜呼治世少而乱世多贤一伸而邪百胜在上者言贵和而不贵正在下者言贵从而不贵得设使一室之中一人唱而十人和一人讷则虽欲言之羣而訖之矣是则和者人之喜默者人之怒吾宁从道而罹怒乎宁违道而从衆乎斯所谓辨难易而权是非矣或曰衆可违而不可从必乎曰未也君子怯於名而勇於实吾非衆之首衆非吾必从君子完其力而已则奚以违理不吾之问辞非人必从君子耳其声而已则奚以违所谓君子者进退周旋羣独语默不失其正而不罹其害者盖在此而已矣

去佛斋【并序】

故温县令杨垂为京兆府参军时奉叔父司徒命撰集丧仪其一篇云七七斋以其日送卒者衣服於佛寺以申追福翱以杨氏丧仪其他皆有所出多可行者惟此一事伤礼故论而去之将存其余云

佛法之流染於中国也六百余年矣始于汉浸淫于魏晋宋之间而烂漫于梁萧氏遵奉之以及于兹盖後汉氏无辨而排之者遂使夷狄之术行于中华故吉凶之礼谬乱其不尽为戎礼也无几矣且杨氏之述丧仪岂不以礼法迁坏衣冠士大夫与庶人委巷无别为是而欲纠之以礼者耶是宜合于礼者存诸愆於礼者辨而去之安得专己心而言也苟惧时俗之怒已耶则杨氏之仪据於古而拂于俗者多矣置而勿言则犹可也既论之而书以为仪舍圣人之道则祸流于将来也无穷矣佛法之所言者列御寇庄周言所详矣其余则皆戎狄之道也使佛

生於中国则其为作也必异於是况驱中国之人举行其术也君臣父子夫妇兄弟朋友存有所养死有所归生物有道费之有节自伏羲至於仲尼虽百代圣人不能革也故可使天下举而行之无弊者此圣人之道所谓君臣父子夫妇兄弟朋友而养之以道德仁义之谓也患力不足而已向使天下之人力足尽修身毒国之术六七十岁之後虽享百年者亦尽矣天行乎上地载乎下其所以生育於其间者畜兽禽鸟鱼鼈蛇龙之类而止尔况必不可使举而行之者耶夫不可使天下举而行之则非圣人之道也故其徒也不蚕而衣裳具弗耨而饮食充安居不作役物以养己者至於几千百万人推是而冻馁者几何人可知矣於是筑楼殿宫阁以事之饰土木铜铁以形之髡良人男女以居之虽璇室象廊倾宫鹿台章华阿房弗加也是岂不出乎百姓之财力欤昔者禹之治水害也三过其门而不入手胼足胝凿九河疏济洛导汉汝决淮江而入于海人之弗为蛟龙食也禹实使然德为圣人功攘大祸立为天子而传曰菲饮食恶衣服卑宫室土阶高三尺其异於彼也如是此昭昭然其大者也详而言之其可穷乎故惑之者溺於其教而排之者不知其心虽辩而当不能使其徒无譁而劝来者故使其术若彼其炽也有位者信吾说而诱之其君子可以理服其小人可以令禁其俗之化也弗难矣然则不知其心无害为君子而溺於其教者以夷狄之风而变乎诸夏祸之大者也其不为戎也幸矣昔者司士责告于子游曰请袭於牀子游曰诺县子闻之曰汰哉叔氏专以礼许人人之袭於牀失礼之细者也犹不可况举身毒之术乱圣人之礼而欲以传於後乎

解惑

王野人名体静盖同州人始游浮山观原未有室居缝纸为裳取竹架树覆以草独止其下豺豹熊象过而驯之弗害也积十年乃构草堂植茶成园犁田三十亩以供衣食不畜妻子少言说有所问尽诚以对人或取其丝约酬利弗问姓名皆与或负之者终不言凡居二十四年年六十二贞元二十五年五月卒於观原茶园村人相与凿木为空盛其屍埋于园中观原积无人居因野人遂成三百家有尚怪者因谬王野人既死处士陈恒发其棺惟见空衣襦与陈恒相遇问其故恒曰作记者欲神浮山故妄云然元和四年十一月翱以节度掌书记奉牒知循州五年正月准制祭名山大川翱奉牲牢于山致帝命遂使斲木为棺命将吏村人改葬野人迁於佛寺南冈其骨存焉乃立木於墓东志曰王处士葬于此削去谬记以解观听者所惑

命解

或曰贵与富在我而已以智求之则得之不求则不得也何命之为哉或曰不然求之有不得者有不求而得之者是皆命也人事何为二子出或问曰二者之言其孰是耶对曰是皆陷人於不善之言也以智而求之者盗耕人之田者也皆以为命者弗耕而望收者也吾无取焉尔循其方由其道虽禄之以千乘之富举而立诸卿大夫之上受而不辞非曰贪也私於己者寡而利於天下者多故不辞也何命之有焉如取之不循其方用之不由其道虽一饭之细犹不可以受况富贵之大耶非曰廉也利於人者鲜而贼於道者多故不为也何智之有焉然则君子之术其亦可知也已

帝王所尚问

夏尚忠殷尚敬周尚文何也曰帝王之道非尚忠也非尚敬与文也因时之变以承其弊而已矣救野莫如敬救鬼莫如文救僂莫如忠循环终始迭相为救如火之菑而烧也人知胜于水矣胜于水者土也水之溃遏其流者则必大为之防矣故夏禹之政忠殷汤之政敬武王之政文各适其宜也如武王居禹之时则尚忠矣汤居武王之时则尚文矣禹与汤交地而居则夏先敬而殷尚乎忠矣故适时之宜而补其不得者三王也使黄帝尧舜居三王之天下则亦必为禹汤武王之所为矣由是观之五帝之与夏商周一道也若救殷之鬼不以文而曰我必以夏之忠而化之是犹适於南而北辕其到也无日矣孔子圣人之大者也若王天下而传周其救文之弊也亦必尚乎夏道矣是文与忠敬皆非帝王之所尚乃帝王之所以合变而行权者也因时之变以承其弊不可休而作为之者尔

正位

善理其家者亲父子殊贵贱别妻妾男女高下内外之位正其名而已矣古之善治其国者先齐其家言自家之刑於国也欲其家之治先正其名而辨其位之等级名位正而家不治者有之矣名位不正而能治其家者未之有也是故出令必当行事必正非义不言三者得则不劝而下从之矣出令不当行事不正非义而言三者不得虽日撻于下下畏其刑而不敢违欲其心服而无辞也其难矣或宠其妻或嬖其妾或听其子或任其所使既爱之则必信其邪言信其邪言则害於人也多益於身者无有苟如此则名位必僭矣他人拒其间则不和顺其过则亏礼不正之则上下无章正之则不得其情不如己者言之则为愚贤於己者言之则为吾欺此治家之所以难也彼人者岂言其家之不治哉纵其心而无畏欲人之於我无违故及於斯而不知也然则可改而为善乎曰耳目鼻口四支百骸与圣人不殊也圣人之道化天下我独不能自化亦足羞也思其不善而弃之则百善成虽希於圣人犹可也改为何有如不思而肆其心之所为则虽圣人亦无可奈何

学可进

百骸之中有心焉与圣人无异也瞿然不复其性感矣哉道其心弗可以庶几於圣人者自弃其性者也终亦亡矣茫茫乎其将何所如冉求非不足乎力者也画而止进而不止者顔子哉噫顔子短命故未到乎仲尼也潢污之停不流也决不到海矣河出崑崙之山其流徐徐行而不休终入于海吾恶知其异於渊之自出者邪李文公集卷四

卷五

钦定四库全书

李文公集卷五

唐 李翱 撰

知凤

有小鸟止於人之家其色青鸛鵒鸟之属咸来哺之未久野之鸟羽而蜚者皆以物至如将哺之其虫积焉羣鸟之鸣声杂相乱是鸟也一其鸣而万物之声皆息人皆以为妖也吾詎知其非凤之类邪古之说凤者有状或曰如鹤或曰如山鷄皆与此不相似吾安得知其凤之类邪凤禽鸟之絶类者也犹圣人之在人也吾闻知贤圣人者观其道由黄帝尧舜禹汤文王至于孔子顔回不闻记其形容有相同者是未可知也如其同也孔子与顔回并立于时鲁国人曷不曰孔之回而顔之丘乎是可知也阳虎之状类孔子圣人是以此畏於匡不书七十子之服于阳虎也有人焉其容貌虽如驩兜恶来顔回子路七十二子苟从而师之者斯为圣人矣故曰知贤圣人者观其道似凤而不见其灵者山鷄也则可似其形而凤之云邪天下之鸟虽凤焉鷹鷂鷓鴣其肯凤之邪是鸟也其形如斯羣鸟皆敬而畏之非凤类而何鸟至於宋州之野当贞元十四年

国马说

有乘国马者与乘骏马者并道而行骏马嚼国马之 血流于地国马行步自若也精神自若也不为之顾如不知也既骏马归刍不食水不饮立而栗者二曰骏马之人以告国马之人曰彼盖其所羞也吾以马往而喻之斯可矣乃如之於是国马见骏马而鼻之遂与之同枥而刍不终时而骏马之病自己夫四足而刍者马之类也二足而言者人之类也如国马者四足而刍则马也耳目鼻口亦马也四支百骸亦马也不能言而声亦马也观其所以为心则人也故犯而不校国马也过而能改骏马也有人焉恣其气以乘人人容之而不知者多矣观其二足而言则人也耳目鼻口亦人也四支百骸亦人也求其所以为人者而弗得也彼人者以形骸为人国马者以形骸为马以彼人乘国马人皆以为人乘马吾未始不谓之马乘人悲夫

截冠雄鸡志

翱至零口北有畜鸡二十二者七其?十五其雌且饮且啄而又狎乎人翱甚乐之遂掬粟投于地而呼之有一雄鷄人截其冠貌若营羣望我而先来见粟而长鸣如命其衆鸡衆鸡闻而曹奔於粟既来而皆恶截冠雄鸡而擊之曳而逐出之已而竞还啄其粟日之暮又二十一其羣栖于楹之梁截冠雄鷄又来如慕侣将登於梁且栖焉而仰望焉而旋望焉而小鸣焉而大鸣焉而延颈喔咿其声甚悲焉而遂去焉至于庭中直上有木三十余尺鼓翅哀鸣飞而栖其树

巔翽異之曰鸡禽于家者也备五德者也其一日见食命侣义也截冠雄鸡是也彼衆鸡得非幸其所呼而来耶又奚为既来而共恶所呼者而迫之耶岂不食其利背其惠耶岂不丧其见食命侣之一德耶且何衆栖而不使偶其羣耶或告曰截冠雄雞客雞也予东里鄙夫曰陈氏之雞也死其雌而陈氏寓之于我羣焉勇且善鬪家之六?雞勿敢独狡焉是以曹恶之而不与同其食及栖焉夫虽善鬪且勇亦不胜其衆而常孤游焉然见食未尝先啄而不长鸣命侣焉彼衆鸡虽赖其召既至反逐之昔日亦由是焉截冠?雞虽不见答然而其迹未曾变移焉翽既闻之惘然感而遂伤曰禽鸟微物也其中亦有独禀精气义而介者焉客鸡义勇超乎羣羣皆妬而尚不与俦焉况在人乎哉况在朋友乎哉况在亲戚乎哉况在乡党乎哉况在朝廷乎哉由是观天地间鬼神禽兽万物变动情状其可以逃乎吾心既伤之遂志之将用警予且可以作鉴于世之人

题燕太子丹传後

荆轲感燕丹之义函匕首入秦劫始皇将以存燕霸诸侯事虽不成然亦壮士也惜其智谋不足以知变识机始皇之道异於齐桓曹沫功成荆轲杀身其所遭者然也及欲促檻车驾秦王以如燕童子妇人且明其不能而轲行之其弗就也非不幸燕丹之心苟可以报秦虽举燕国而不顾况美人哉轲不晓而当之陋矣

拜禹言

贞元十五年六月二十九日陇西李翽敬再拜于禹之堂下自宾阶升北面而立弗敢叹弗敢祝弗敢祈退降复敬再拜哭而归且歌曰

惟天地之无穷兮哀生人之常勤往者吾弗及兮来者吾弗闻已而已而

送冯定序

冯生自负其气而中立上无授下无交名声未大耀於京师生信无罪是乃时之人见之者或不能知之知之者则不敢言是以再举进士皆不如其心谓生无戚戚盖以他人为解予聯以杂文罢黜不知者亦纷纷交笑之其自负益明退学书感愤而为文遂遭知音成其名当黜辱时吾不言其拙也岂无命耶及既得之吾又不自言其智也岂有命邪故谓生无戚戚生家贫甚不能居告我游成都成都有岷峨山合气於江源往往出奇怪之士古有司马相如扬雄严君平其人死至兹千年不闻生游成都试为我谢岷峨何其久无人耶其风侈丽奢豪羈人易留生其思速出於劒门之艰难勿我忧也

杂说

日月星辰经乎天天之文也山川草木罗乎地地之文也志气言语发乎人人之文也志气不能塞天地言语不能根教化是人之文纒繆也山崩川涸草木枯死是地之文裂絶也日月晕

蚀星辰错行是天之文乖盪也天文乖盪无久覆乎上地文裂絕无久载乎下人文纰繆无久立乎天地之间故文不可以不慎也夫毫厘分寸之长必有中焉咫尺寻常之长必有中焉百千万里之长必有中焉则天地之大亦必有中焉居之中则长短大小高下虽不一其为中则一也是以出言居乎中者圣人之文也倚乎中者希圣人之文也近乎中者贤人之文也背而走者盖庸人之文也中古以来至於斯天下为文不背中而走者其希矣岂徒文背之而已其视听识言又甚於此者矣凡人皆有耳目心口耳所以察声音大小清浊之异也目所以别采色朱紫白黑之异也心所以辨是非贤不肖之异也口所以达耳之聪导目之明宣心之知而悖教化阜风俗期所以不忤天地人神也然而耳不能听声恶得谓之耳欤目不能别色恶得谓之目欤心不能辨是非好恶恶得谓之心欤口不能宣心之智导目之明达耳之聪恶得谓之口欤四者皆不能於己质形虚为人尔其何以自异於犬羊麋鹿乎哉此皆能己而不自用焉则是不信己之耳目心口而信人之耳目心口者也及其师旷之聪离娄之明臧武仲之智宰我之言则又不能信之於己其或悠然先觉者必谓其狂且愚矣昔管仲以齐桓霸天下攘荆蛮以尊周室九合诸侯崇崇乎功亦格天下溢後世而曾西不忍为管仲也孟轲又不肯为曾西向使孟轲曾西生於斯世秉其道终不易持其道终不变吾知夫天下之人从而笑之又从而诟之曰狂民尔顽民尔是其心恶有知哉曾西孟轲虽被讪谤于天下亦必固穷不可拔以须後圣尔其肯畏天下之人而动乎心哉世俗之鄙陋迫隘也如此夫何敢复言安得曾西孟轲而与之昌言哉

又

龙与蛇皆食於凤龙智而神其德无方凤知其可与皆为灵也礼而亲之蛇毒而险所忌必伤且恶其得於凤也不惟啮龙虽遇麟龟固将噬而亡之凤知蛇不得其欲则将协豺犬而来吠嚙也赋之食加于龙以龙之神浮於食也将使饱焉终畏蛇而不能麟与龟瞠而讴曰凤兮凤兮何德之衰往者不可谏来者犹可追已而已而既而麟伤于毒伏于窟龟屏气潜于殼蛇伺龙之寐也以毒攻其喉而龙走凤丧其助於是下翼而不敢灵也

李文公集卷五

卷六

<集部,别集类,汉至五代,李文公集>

钦定四库全书

李文公集卷六

唐 李翱 撰

答韩侍郎书

还示云於贤者汲汲惟公与不材耳此言取人得无太寬否灼然太寬夫又何疑此事汲汲如嗜欲之未得自以为胜苟令君耳目所及书记所载未见其比何意忽然当一时而更有人也故具於後以当讲学且自道无愧兼以为戏耳如愚之於人但患识昏智不足以察人为累耳苟以为贤则不要前人相知相识逢便见机巧有慧辨故身虽否塞而所进达者不为少矣其鉴赏称颂人物初未甚信其後卒享盛名为贤士者故陆歙州韦简州皆是也好善太疾智识未精彼胜於彼则因而进之或取文辞或以言论或以才行或以风标或以政术往往亦有不称於前多矣不可以言其名然亦未尝以为悔也其中亦有痛与置力後因礼节不足或因尽言以诤之前人既非贤良遂反相毁损者亦有其人矣且龐士元云拔十失五犹得其半真大贤之言也如鄙人无位於朝厄摧於时恹恹惶惶奔走耻辱求食不暇自一千年来贤士屈厄未见有如此者尚汲汲孜孜引荐贤俊如朝饥求飧如久旷思通如见妖丽而不得亲然若使之有位於朝或如兄侪得志於时则天下当无屈人矣如或万一有之若陆歙州韦简州之比犹奔走在泥土则当引罪在己若狂若颠朝虽饥不敢求飧旷虽久不敢思通见妖丽闲暇而不观视迁荣如鞭笞宫割之在躬夫又何荣乐而得安然也不知此心自古以来曾有人如是者否不知代有圣人排肩而生曾有一贤用心近於此者乎若古或有之幸示其人如或无之奈何乃言惟公与不材耳如兄者颇亦好贤必须甚有文辞兼能附己顺我之欲则汲汲孜孜无所忧惜引拔之矣如或力不足则分食以食之无不至矣若有一贤人或不能然则将乞丐不暇安肯孜孜汲汲为之先後此秦汉间尚侠行义之一豪隼耳与鄙人似同而其实不同也三五日前京尹从叔云某大官甚知重陆洵当时对云士所贵人知者谓名未达则道之家之贫则恤之身之贱则进之故也若陆洵之贤章然矣某官之知既甚矣某官之位日见於天子足以进人矣开幕辟士足以招贤矣而皆未及陆洵若如此之知知与不知果同也若实知乃反不如不知矣京尹不能对也大凡身当位得志於时慎闭口不可以言知人若知人而不能进志未得而气怏体安不引罪在己若颠若狂与夫不知人者何以异也如离娄与瞽偕行而同坠沟中或以无目不见坑而坠或以心不在行忧思之病而坠所以坠则殊其所以为坠则同也天下如瞽者鲜则其坠者皆离娄也心不在焉故也乐道此者盖以自励非欲刺乎富贵之人当为再三读之以代擊髀而歌焉某再拜

答独孤舍人书

足下书中有无见怨怼以至疎索之说盖是戏言然亦似未相悉也荐贤进能自是足下公事如不为之亦自是足下所阙在仆何苦乃至怨怼仆尝怪董生大贤而着仕不遇赋惜其自待不厚凡人之蓄道德才智於身以待时用盖将以代天理物非为衣服饮食之鲜肥而为也董生道德备具武帝不用为相故汉德不如三代而生人受其顛顛於董生何苦而为仕不遇之词乎仆意绪间自待甚厚此身穷达岂关仆之贵贱耶虽终身如此固无恨也况年犹未甚老哉去年足下有相引荐意当时恐有所累犹奉止不为何遽不相悉所以不数附书者一二年来往还多得官在京师既不能周遍又且无事性颇慵懒便一切画断只作报书又以为苟相知固不在书之疎数如不相知尚何求而数书或惟往还中有贫贱更不如仆者即数数附书耳近频得人书皆责疎简故具之於此见相怪者当为辞焉

答皇甫湜书

辱书览所寄文章词高理直欢悦无量有足发予者自别足下来仆口不曾言文非不好也言无所益衆亦未信祇足以招谤忤物於道无明故不言也仆到越中得一官三年矣材能甚薄泽不被物月费官钱自度终无补益累求罢去尚未得以为愧仆性不解谄佞坐不能曲事权贵以故不得齿於朝廷而足下亦抱屈在外故略有所说凡古贤圣得位於时道行天下皆不着书以其事业存於制度足以自见故也其着书者盖道德充积厄摧於时身卑处下泽不能润物耻灰燼而泯又无圣人为之发明故假空言是非一代以传无穷而自光耀于後故或往往有着书者仆近写得唐书史官才薄言词鄙浅不足以发扬高祖太宗列圣明德使後之观者文采不及周汉之书仆以为西汉十一帝高祖起布衣定天下豁达大度东汉所不及其余惟文宣二帝为优自惠景以下亦不皆明於东汉明章两帝而前汉事迹灼然传在人口者以司马迁班固叙述高简之工故学者悦而习焉而其读之详也足下读范曄汉书陈壽三国志王隐晋书生熟何如左丘明司马迁班固书之温习哉故温习者事迹彰而罕读者事迹晦读之疎数在词之高下理必然也唐有天下圣明继于周汉而史官叙事曾不如范曄陈壽所为况足拟望左丘明司马迁班固之文哉仆所以为耻当兹得于时者虽负作者之材其道既能被物则不肯着书矣仆窃不自度无位於朝幸有余暇而词句足以称讚明盛纪一代功臣贤士行迹灼然可传於後自以为能不灭者不敢为让故欲笔削国史成不刊之书用仲尼褒贬之心取天下公是公非为本羣党之所谓为是者仆未必以为是羣党之所谓为非者仆未必以为非使仆书成而传则富贵而功德不着者未必声名於後贫贱而道德全者未必不烜赫於无穷韩退之所谓诛奸谀于既死发潜德之幽光是翱心也仆文采虽不足以希左丘明司马子长足下视仆叙高愍女杨烈妇岂尽出班孟坚蔡伯喈之下耶仲尼有言曰不有博奕者乎为之犹贤乎已仆所为虽无益於人比之博弈犹为胜也足下以为何如哉古之贤圣当仁不让於师仲尼则曰文王既没文不在兹乎又曰予欲无言天何言哉孟轲则曰予之不遇鲁侯天也臧氏之子安能使予不遇乎司马迁则曰成一家之言藏之名山以俟後圣人君子仆之不让亦非大过也幸无怪某再拜

答朱载言书【一本作梁载言】

某顿首足下不以某卑贱无所可乃陈词屈虑先我以书且曰余之艺及心不能弃於时将求

知者问谁可则皆曰其李君乎告足下者过也足下因而信之又过也果若来陈虽道备具犹不足辱厚命况如某者多病少学其能以此堪足下所望大而深宏者耶虽然盛意不可以不答故敢略陈其所闻盖行己莫如恭自责莫如厚接衆莫如弘用心莫如直进道莫如勇受益莫如择友好学莫如改过此闻之於师者也相人之术有三迫之以利而审其邪正设之以事而察其厚薄问之以谋而观其智与不才贤不肖分矣此闻之於友者也列天地立君臣亲父子别夫妇明长幼浹朋友六经之旨也浩乎若江海高乎若丘山赫乎若日火包乎若天地掇章称咏津润怪丽六经之词也创意造言皆不相师故其读春秋也如未尝有诗也其读诗也如未尝有易也其读易也如未尝有书也其读屈原庄周也如未尝有六经也故义深则意远意远则理辨理辨则气直气直则辞盛辞盛则文工如山有恒华嵩衡焉其同者高也其草木之荣不必均也如渚有淮济河江焉其同者出源到海也其曲直浅深色黄白不必均也如百品之杂焉其同者饱於腹也其味咸酸苦辛不必均也此因学而知者也此创意之大归也天下之语文章有六说焉其尚异者则曰文章辞句奇险而已其好理者则曰文章叙意苟通而已其溺於时者则曰文章必当对其病於时者则曰文章不当对其爱难者则曰文章宜深不当易其爱易者则曰文章宜通不当难此皆情有所偏滯而不流未识文章之所主也义不深不至於理言不信不在於教劝而词句怪丽者有之矣剧秦美新王褒僮约是也其理往往有是者而词章不能工者有之矣刘氏人物表王氏中说俗传太公家教是也古之人能极於工而已不知其词之对与否易与难也诗曰忧心悄悄愠于羣小此非对也又曰遘闵既多受侮不少此非不对也书曰朕圣谗说殄行震惊朕师诗曰菀彼桑柔其下侯旬捋采其刘瘼此下民此非易也书曰允恭克让光被四表格於上下诗曰十亩之间兮桑者闲闲兮行与子旋兮此非难也学者不知其方而称说云云如前所陈者非吾之敢闻也六经之後百家之言兴老聃列御寇庄周鶡冠田穰苴孙武屈原宋玉孟轲吴起商鞅墨翟鬼谷子荀况韩非李斯贾谊枚乘司马迁相如刘向扬雄皆足以自成一家之文学者之所师归也故义虽深理虽当词不工者不成文宜不能传也文理义三者兼并乃能独立於一时而不泯灭於後代能必传也仲尼曰言之无文行之不远子贡曰文犹质也质犹文也虎豹之鞶犹犬羊之鞶此之谓也陆机曰怵他人之我先韩退之曰惟陈言之务去假令述笑哂之状曰莞尔则论语言之矣曰哑哑则易言之矣曰粲然则谷梁子言之矣曰攸尔则班固言之矣曰輶然则左思言之矣吾复言之与前文何以异也此造言之大归吾所以不协于时而学古文者悦古人之行也悦古人之行者爱古人之道也故学其言不可以不行其行行其行不可以不重其道重其道不可以不循其礼古之人相接有等轻重有仪列於经传皆可详引如师之於门人则名之於朋友则字而不名称之於师则虽朋友亦名之子曰吾与回言又曰参乎吾道一以贯之又曰若由也不得其死然是师之名门人验也夫子於郑兄事子产於齐兄事晏婴平仲传曰子谓子产有君子之道四焉又曰晏平仲善与人交子夏曰言游过矣子张曰子夏云何曾子曰堂堂乎张也是朋友字而不名验也子贡曰赐也何敢望回又曰师与商也孰贤子游曰有澹台灭明者行不由径是称於师虽朋友亦名验也孟子曰天下之达尊三曰德爵年恶得有一以慢其二哉足下之书韦君词杨君潜足下之德与二君未知先後也而足下齿幼而位卑而皆名之传曰吾见其与先生并行非求益者欲速成窃惧足下不思乃陷于此韦践之与翱书亟叙足下之善故敢尽辞以复足下之厚意计必不以为犯李某顿首

卷七

钦定四库全书

李文公集卷七

唐 李翱 撰

论事於宰相书

凡居上位之人皆勇於进而懦於退但见己道之行不见己道之塞日度一日以至於黜退奄至而终不能先自为谋者前後皆是也阁下居位三年矣其所合於人情者不少其所乖於物议者亦已多矣奸邪登用而不知知而不能去柳泌为刺史疏而不止韩潮州直谏贬责诤而不得道路之人咸曰焉用彼相矣阁下尚自恕以为犹可以辅政太平虽枉尺犹能直寻较吾所得者不啻补其所失何足遽自为去就也切怪阁下能容忍亦已甚矣昨日来高枕不寐静为阁下思之岂有宰相上三疏而止一邪人而终不信阁下天资畏慎人不能显辨其事忍耻署勅内愧私叹又将自恕曰吾道尚行吾言尚信我果为贤相矣我若引退则谁能辅太平耶是又不可之甚也当贞观之初房杜为相以为非房杜则不可也开元之初姚宋为相以为非姚宋则不可也房杜姚宋之不为相亦已久矣中书未尝无宰相然则果何必於房杜姚宋况道不行虽臯陶伊尹将何为也房杜姚宋诚贤也若道不行言不信其心所谓贤者终不敢不进其心所谓邪者终不敢不辨而许敬宗李义府同列用事言信道行又自度智力必不足以排之矣则将自引而止乎将坐而待黜退乎尚自恕苟安於位乎以阁下之明度之当可知矣凡虑己事则不明断他人事则明己私而他人公勇易断也承阁下厚知受獎擢者不少能受阁下德而献尽言者未必多人幸蒙以国士见目十五年余矣但欲自竭其分耳听与怪在阁下载之而已

劝裴相不自出征书

三两日来皆传阁下以淄青未平又请东讨虽非指的或虑未实万一有之只可先事而言岂得後而有悔且如房杜姚宋时政大耀而无武功郭汾阳二李太尉立大勲而不当国政阁下以舍人使魏博六州之地归矣自秉大政兵诛蔡州久而不克奉命宣慰未经时而吴元济生擒矣使一布衣持书涉河而王承宗恐惧委命割地以献矣自武德以来宰相居庙堂而成就功业者未有其比是宜以功成身退养德善守为意奈何如始进之士汲汲於功名复欲出征以速平寇贼之为事耶自秦汉以来亦未尝有立大功而不知止能保其终者即韩侍郎亲率重兵以压境矣田司空深入贼地以立功矣夫人之情亦各欲成功在己惟恐居下顾宰相衔命领三数书生指麾来临坐而享其功名耶夺人之功不可一也功高不赏不可二也兵者危道万一句月不即如志是坐弃前劳不可三也凡三事昭灼易见岂或事在於己而云未熟邪伏望试以狂言访于所知之厚者意切辞尽不暇文饰伏惟少赐省察翱再拜

荐士於中书舍人书

前岭南节度判官试大理司直兼殿中侍御史韦词处士石洪【明经出身十五年前曾任冀州纠】前宣歙来石军判官试太常寺协律郎路随江西观察推官试秘书郎独孤朗右三人先已论荐一人继此咨陈如韦之才能无方忠厚可保翱与南中共更外患始终若一此人先为一二阁人之所排诋闻宰相惑於流言都无意拔用如此材能岂可不达适足以厚其资耳石洪之贤优於李渤身遯而道光材长而器厚若在班列必有殊迹如路随首以父在蕃中未敢昏娶年六度矣不蓄仆妾居处常如在丧虽曾闵复生何以加此其见解高明事悉相类独孤朗人物材能不後韩林起居比以伯父年高罢举归侍遂伯父之身岂非厚於孝而薄於名者耶凡此四人材能行义超越流辈自二年来阅除书采擢後进多矣未见胜之者或隔以浮言或限以资叙贤者自处而不求苟进在上者无超异之心因循而不用则冯唐白首董生不遇何足怪哉翱以为宰物之心患时无贤能可以推引未闻其以资叙流言而蔽之也天下至大非一材之所能支任重道远非徇谗狠之心所能将明也嗟夫翱之说未必果信於兄之言亦未尽行於时虽殷勤发明何有成益但知而不告则负於中心耳

谢杨郎中书

月日乡贡进士李翱再拜前者以所着文章献于阁下累获咨嗟勤勤不忘翱率性多感激每读古贤书有称誉荐进後学之士则未尝不遥想其人若与神交叹息悲歌夜而复明何独乐已往之事哉诚窃自悲也临空文尚慨慕如不足况亲遇厥事观厥人哉幸甚幸甚翱自属文求举有司不获者三栖遑往来困苦饥寒踣而未能奋飞者诚有说也窃惟当兹之士立行光明可以为後生之所依归者不过十人焉其五六人则本无劝诱人之心虽有卓犖奇怪之贤固不可得而知也其余则虽或知之欲为之荐贤於人又恐人之不我信因人之所不信复生疑而不自自信且犹不固矧曰能知人之固是以再往见之或不如其初三往见之又不如其再若张燕公之於房太尉独孤常州之於梁补阙者讫不见二人焉夫如是则非独後进者学浅词陋之罪也抑亦先达称誉荐进之道有所不至也孔子曰举尔所知古君子於人之善惧不能知既知之耻不能誉之能誉之耻不能成之若翱者穷贱朴讷无所取然既为阁下之所知敢不以古君子之道有望於阁下哉不宣翱载拜

与陆惨书

李观之文章如此官止於太子校书郎年止於二十九虽有名於时俗其卒深知其至者果谁哉信乎天地鬼神之无情於善人而不罚罪也甚矣为善者将安所归乎翱书其人贈於兄贈於兄盖思君子之知我也与李观平生不得相往来及其死也则见其文尝谓使李观若永年则不远於扬子云矣书己之文次忽然若观之文亦见知於君也故书苦雨赋綴于前当下笔时复得咏其文则观也虽不永年亦不甚远於扬子云矣书苦雨之辞既又思我友韩愈非兹世之文古之文也非兹世之人古之人也其词与其意适则孟轲既没亦不见有过於斯者当其下笔时如他人疾书写之诵其文不是过也其词乃能如此尝书其一章曰获麟解其他可以类知也穷愁不能无所述适有书寄弟正辞及其终亦自觉不甚下寻常之所为者亦书以

贈焉亦惟讀觀愈之辭既試一詳焉鞠躬再拜

答侯高第二書

足下復書來會與一二友生飲酒甚樂故不果以時報三讀足下書感嘆不休非足下之愛我甚且欲吾身存而吾道光明也則何能開難出之辭如此之無愛乎前書所以不受足下之說而復辟之者將以明吾道也吾之道非一家之道是古聖人所由之道也吾之道塞則君子之道消矣吾之道明則堯舜文武孔子之道未絕於世也前書若與足下混然同辭是宮商之一其聲音也道何由而明哉吾故拒足下之辭知足下必將憤予而復其辭也足下再三教我適時以行道所謂時也者乃仁義之時乎將浮沈之時乎時苟仁且義則吾之道何所屈焉爾如順浮沈之時則必乘波隨流望風高下焉苟如此雖足下之見我且不識矣況天下之人乎不修吾道而取容焉其志亦不遐矣故君子非仁與義則無所為也如有一朝之患古君子則不患也吾之道學孔子者也孔子尚畏於匡圍於蒲伐樹於桓魋逐於魯絕糧於陳蔡之間夫孔子豈不知屈伸之道耶故賢不肖在我者也貴與富貧與賤道之行否則有命焉君子正己而須之爾雖聖人不能取其容焉故孔子謂子路子貢曰詩云匪兕匪虎率彼曠野吾道非耶何為至於此子路對曰意者吾未仁且智耶而人之不我信與行也子曰有是乎使仁者而必信安有伯夷叔齊使智者而必行安有王子比干子貢對曰夫子之道至大故天下莫能容蓋少貶夫子之道子曰良農能稼而不能為穡良工能巧而不能為順君子能修其道綱而紀之統而理之而不能為容爾不修道而求為容賜也而志不遠矣謂顏淵如謂由賜顏淵對曰夫子之道至大故天下莫能容雖然夫子推而行之不容何病夫道之不修也是吾丑也夫道既已大修而世不用是有國者之丑也夫子何病不容然後見君子孔子蓋嘆之也以孔子門人三千其聖德如彼之至也而知孔子者獨顏回爾其他皆學焉而不能到者也然則仆之道天下人安能信而行耶足下之言曰西伯孔子何等人也皆以柔氣污辭同用明夷也以避禍患斯人豈浮世邪人乎西伯聖人也美里之拘僅得免焉孔子聖人之大者也其屈厄如前所陳惡在其能取容於世乎故曰危行言遜所以遠害也其道則不爾其能遠之與否而必容焉則吾不敢知也非吾獨爾孔子亦不知也仆之道窮則樂仁義而安之者也如用焉則推而行之於天下也何獨天下哉將後世之人有得於吾之功者爾天之生我也亦必有意矣將欲愚生民之視聽乎則吾將病而死尚何能伸其道也如欲生民有所聞乎則吾何敢辭也然則吾道之行與否皆運也吾不能自知也天下人安能害於我哉足下又曰吾子夷齊之道也如仆向者所陳亦足以免矣故不復有所說若韓孟與吾子之於我心故知我者也苟異心同辭皆如足下所說是仆於天下衆多之人而未有一知己也安能動於吾之心乎吾非不信子之云云者也信子則於吾道不光矣欲默默則道無所傳云爾子之道子宜自行之者也勿以誨我

李文公集卷七

卷八

钦定四库全书

李文公集卷八

唐 李翱 撰

荐所知於徐州张仆射书

翱再拜齐桓公不疑於其臣管夷吾信而霸天下攘夷狄匡周室亡国存荆楚服诸侯无不至焉竖刁易牙信而国乱身死不葬五公子争立兄弟相及者数世桓公之信於其臣一道也所信者贤则德格于天地功及於後代不得其人则不免其身知人不易也岂惟霸者为然虽圣人亦不能免焉帝尧之时贤不肖皆立於朝尧能知舜於是乎放驩兜流共工殛鯀窜三苗举禹稷咎繇二十有二人加诸上位故尧崩三载四海遏密八音後代之人皆谓之帝尧焉向使尧不能知舜而遂尊驩兜共工之党於朝禹稷咎繇之下二十有二人不能用则尧将不得为齐桓公矣岂复得曰大哉尧之为君也惟天为大惟尧则之荡荡乎民无能名焉者哉春秋曰夏灭项孰灭之盖齐灭之曷为不言齐灭之为桓公讳也春秋为贤者讳此灭人之国何贤尔君子之恶恶也嫉始善善也乐终桓公尝有继絶存亡之功故君子为之讳也继絶存亡贤者之事也管夷吾用所以能继絶世存亡国焉耳竖刁易牙则不能也向使桓公始不用管夷吾未有竖刁易牙争权不葬而乱齐国则幽厉之诸侯也始用贤而终身讳其恶君子之乐用贤也如此始不用贤以及其终而幸後世之掩其过也则微矣然则居上位流德泽於百姓者何所劳乎劳於择贤得其人措诸上使天下皆化之焉而已矣兹天子之大臣有土千里者孰有如执事之好贤不倦者焉盖得其人亦多矣其所可求而不取者则有人焉陇西李观奇士也伏闻执事知其贤将用之未及而观病死昌黎韩愈得古文遗风明於理乱根本之所由伏闻执事又知其贤将用之未及而愈为宣武军节度使之所用观愈皆豪杰之士也如此人不时出观自古天下亦有数百年无如其人者焉执事皆得而知之皆不得而用之翱实为执事惜焉岂惟翱一人而已後之读前载者亦必多为执事惜之矣兹有平昌孟郊贞士也伏闻执事旧知之郊为五言诗自前汉李都尉苏属国及建安诸子南朝二谢郊能兼其体而有之李观荐郊于梁肃补阙书曰郊之五言其有高处在古无上其有平处下顾二谢韩愈送郊诗曰作诗三百首杳默咸池音彼二子皆知言者岂欺天下之人哉郊穷饿不得安养其亲周天下无所遇作诗曰食荠肠亦苦强歌声无欢出门即有阙谁谓天地寬其穷也甚矣又有张籍李景俭者皆奇才也未闻阁下知之凡贤人奇士皆自有所负不苟合於世是以虽见之难得而知也见而不能知其贤如勿见而已矣知其贤而不能如勿知其贤而已矣用而不能尽其材如勿用而已矣能尽其材而容谗人之所间者如勿尽其材而已矣故见贤而能知知而能用用而能尽其材而不容谗人之所间者天下一人而已矣兹有二人焉皆来其一贤士也其一常常人也待之礼貌不加隆焉则贤者行而常常人日来矣况其待常常人加厚则善者何求而来哉孔子曰吾未见好德如好色者圣人不好色而好德者也虽好色而不如好德者次也德与色钧好之又其次也虽好德而不如好色者下也最甚不好德而好色者穷矣有人告曰

某所有女国色也天下之人必将极其力而求之而无所变矣有人告曰某所有人国士也天下之人则不能一往而见焉是岂非不好德而好色者乎贤者则宜有以别於天下之人矣孔子述易定礼乐删诗序书作春秋圣人也奋乎百世之上其所化之者非其道则夷狄之人也而孔子之庙存焉虽贤者亦不能日往拜之以其益於人者寡矣故无益於人虽孔子之庙尚不能朝夕而事焉况天下之人乎有待於人而不能得善人良士则不如无待也呜呼人之降年不可与期郊将为他人之所得而大有立於世与其短命而死皆不可知也二者卒然有一於郊之身他日为执事惜之不可既矣执事终不得而用之矣虽恨之亦无可奈何矣翱穷贱人也直辞无让非所宜至於此者也为道之存焉耳不直则不足以伸道也非好多言者也翱再拜

与淮南节度使书

翱自十五已後即有志於仁义见孔子之论高弟未尝不以及物为首克伐怨欲不行未得为仁管仲不死子纠复相为讐而功及天下则曰如其仁曰由也果赐也达求也艺於从政乎何有然则圣贤之於百姓皆如视其子教之仁父母道也故未尝不及於衆焉近代已来俗尚文字为学者以钞集为科第之资曷尝知不迂怒不貳过为兴学之根乎入仕者以容和为贵富之路曷尝以仁义博施之为本乎由是经之旨弃而不求圣人之心外而不讲干办者为良吏适时者为通贤仁义教育之风於是乎扫地而尽矣生人困穷不亦宜乎州郡之乱又何怪焉窃尝病此以故为官不敢苟求旧例必探察源本以恤养为心以戢豪吏为务以法令自捡以知足自居利於物者无不为利於私者无不诟比之时辈亦知颇异思齐古人则十曾未及其一二为恨耳自到有改易条上者亦有细碎侵物彰从前之失太深不令条上者纵未穷尽亦十去其九矣惟两三事即须使司处置已有申上者未蒙裁下谨具公状若或并赐处分则当州里无弊矣盖古人屈於不知己而伸於知己翱不肖既已谬蒙十一叔知獎如此其又何敢不言翱再拜

贺行军陆大夫书

某月日布衣李翱寄贺书谨再拜大夫阁下窃闻阁下白宰相使汴州人执邓惟恭归于京师奏天子处其轻重生死罪伏覩诏书舍惟恭死罪俾永为黔首於汴州翱九月时上宰相书言政刑中有词曰亲戚怀二杀之可也况怀二且非亲戚哉当是时惟恭在其位故不直书而微其词然则惟恭之罪闻知於四方其孔甚矣呜呼乱本既除矣自兹日厥後汴宋颍亳人其无事矣岂汴宋颍亳人而已实天下皆受其利昔阁下为建州刺史人足食与衣且知廉耻礼义治平为天下第一其为信州犹建州也其为汝州犹信州也汴人苦其政失其心十五年矣久则不易变矣亦惟阁下孜孜不怠致汴州犹汝州焉天下莫不幸甚而翱则喜乐万乎世之民所以然者夫陋巷短褐躬学古知道之人其所以异於朝廷藩翰大臣王公卿士者口未尝厌乎肥甘尔体未尝焕乎绮纨尔目未尝悦乎采色尔耳未尝乐乎声音尔居处未尝宿乎华屋尔出游未尝乘乎乘黄尔禄利未尝入於家尔名字未尝得进於天王尔其如此而已至若忧天下之艰难幸天下之和平乐天下之人民得与其身臻乎仁壽思九夷八蛮解辫髮椎髻同车书文轨则虽朝廷藩翰大臣王公卿士亦未必皆甚乎陋巷短褐躬学古知道之人者也若

必皆甚焉则天下之理得日变化可以如响之应乎声也故天地山川草木鳞羽之瑞有一可以以为昇平之符者时政有一可以教民者藩屏之臣有一可以长人行化者则未尝不私自喜乐也万类含育有一伤和平之气者夷狄蛮戎之俗有一拂乎道者时政有一不毗於下民者则未尝不私自忧惧也而况其远者大者乎天下之一善固不足以喜乐然多其善则太平之基可庶几乎天下之一不善固不足以忧惧然累其不善则颠覆之形殆将至也太平之基颠覆之形乃从政者之所喜乐忧惧尔其为布衣守道之人不同任如耳之不司采色文章也而与知之者士之躬学古知道者固与夫天下百姓同忧乐而不敢独私其心也翱虽不肖未尝瞬息动心而不景行乎此也是以忧乐万乎世之民也亦惟少加意焉翱再拜

劝河南尹复故事书

某道无可重每为阁下所引纳又不隔卑贱时访其第故窃意阁下或以翱为有所知也情苟有未安不宜以默故详之以辞河南府板榜县於食堂北梁每年写黄纸号曰黄卷其一条曰司録入院诸官於堂上序立司録揖然後坐河南大府入圣唐来二百年前人制条相传岁久苟无甚弊则轻改之不如守故事之为当也八九年来司録使判司立东廊下司録於西廊下得揖然後就食而板条黄卷则如故文焉大凡庸人居上者以有权令陵下处下者以姑息取容势使然也前年翱为户曹恐不知故事举手触罚因取黄卷详之乃相见之仪与故事都异至东知厨黄卷为状白於前尹判榜食堂时被林司録入谗盛词相毁前尹拒之甚久而竟从其请翱以为本不作作则勿休且执故事争而不得於本道无伤也遂入辨焉白前尹曰中丞何轻改黄卷二百年之旧礼而重违一司録之徇情自用乎前尹曰此事在黄卷否翱对曰所过状若不引黄卷故事是罔中丞也其何敢前尹因取黄卷简条省之使人以黄卷示司録曰黄卷是故事岂得责人执守当司録所过状注判云黄卷有条即为故事依榜当时论者善前尹之能复故事焉自後翱为司録所毁无所不言前尹相告曰公以守官直道纠曹所伤乃至激横过朝官於某处揖公见公公事独立且又知毁之所来故塞耳不听翱虑前尹迁改来者不知为谁终获戾故後数十日以软脚乞将去官不五六日亦幸有勅之除替人因以罢免前日阁下偶说及此云近者缘陆司録之故却使复两廊相见之仪此义盖惑阁下听者必曰京兆府之仪如此阁下从事京兆府习其故而信之焉尔夫事有同而宜异者京兆府司録上堂自东门北入故东西廊相见得所宜也河南司録上堂於侧门东入直抵食堂西门故旧礼於堂上位立得所宜矣若却折向南是司録之欲自崇而卑衆官非所宜也此事同而宜异者耳假令司録上堂由南门北入河南府二百年旧礼自可守行亦不当引京兆府之仪而改之也况又自侧门东入者耶河南尹大官也居之岁久不为滞且如故门下郑相公之德而居之六年阁下之为河南尹亦近何知未归朝廷间亦有贤者未得其所或来为曹掾者耶安可弃旧礼使之立於东廊下夏则为暑日之所炽曝冬则为风雪之所飘洒无乃使论者以阁下为待一司録过厚而不为将来贤者之谋耶且此事某前年辨之因而获胜阁下前日亦自言某不知有侧门故也且阁下曹掾非为不多乃无一人执旧礼以坚辨焉此亦可叹也夫圣人然後能免小过窃恐阁下於此事思虑或有所未至而官属等唯唯走退莫能进言则谁与阁下为水火酸咸少相承者以大府而苟以自尊者寡见细人之所行耳卢司録性甚公方未必乐此阁下召问之可也伏望不轻改二百年之旧礼重惜一时之所未达意尽词直无以越职出位言为罪幸甚某再拜

寄从弟正辞书

知尔京兆府取解不能如其所怀念勿在意凡人之穷达所遇亦各有时尔何独至於贤丈夫而反无其时哉此非吾徒之所忧也其所忧者何畏吾之道未能到於古之人尔其心既自以为到且无谬则吾何往而不得所乐何必与夫时俗之人同得失忧喜而动於心乎借如用汝之所知分为十焉用其九学圣人之道而知其心使有余以与时世进退俯仰如可求也则不啻富且贵矣如非吾力也虽尽用其十祇益劳其心矣安能有所得乎汝勿信人号文章为一艺夫所谓一艺者乃时世所好之文或有盛名於近代者是也其能到古人者则仁义之辞也恶得以一艺而名之哉仲尼孟轲歿千余年矣吾不及见其人吾能知其圣且贤者以吾读其辞而得之者也後来者不可期安知其读吾辞也而不知吾心之所存乎亦未可诬也夫性於仁义者未见其无文也有文而能到者吾未见其不力於仁义也由仁义而後文者性也由文而後仁义者习也犹诚明之必相依尔贵与富在乎外者也吾不能知其有无也非吾求而能至者也吾何爱而屑屑於其间哉仁义与文章生乎内者也吾知其有也吾能求而充之者也吾何惧而不为哉汝虽性过於人然而未能浩浩其心吾故书其所怀以张汝且以乐言吾道云尔

与翰林李舍人书

翱思逃後祸所冀存身惟能休罢最愜私志从此永已矣更无健美之怀况乞得余年退修至道上可以追赤松子房之风岂止於比二疏尚平子而已但举世好爵禄权柄具写此心以告人人无有少信之者皆为不诚之言也王拾遗是桂州旧僚颇知此志若与往来伏望问之可知其旨但以常情见待岂知失时还有偏尚之士哉又近日来两施子粗得其说未及就正当此时使获长往亦足以不愧宗门不负朋友尝慕张公以不能取容当世故终身不仕况向前仕宦亦以多矣幸免刑戮方尔退修与致令名年已六十有一比之诸叔父兄弟为得年矣且不知余年几何意愿乞取残年以修所知之道如或有成是万世一遇纵使无成且能早知止足高静与三老死于林藪之下比其终日矻矻耽乐富贵而大功德不及於海内而卒於位者所失得伏计舍人必以辨之矣以舍人比他见知故尽其意焉若非至诚亦何苦而强发斯言乎

李文公集卷八

卷九

钦定四库全书

李文公集卷九

唐 李翱 撰

论事疏表

臣翱言臣素陋幸得守职史官以记录是非为事夫通前古治乱安危之大本者实史臣之任也臣虽愚敢怀畏罪之心而不修其职窃见陛下即位以来招怀不廷之臣诛寇贼十余事刷五圣之愤耻为後代之根本自古中兴之盛孰有及者自臣得奉诏朝谒以来亲见圣德之所不可及亦已多矣至如淄青生口夏侯澄等四十七人皆所宜诛斩者也陛下知其逆贼所逼胁质其父母妻子而驱之使战其陷恶逆非其本心赦而不诛因诏田弘正随材任使其欲归妻子父母者纵而不禁臣窃闻夏侯澄等既得生归淄青贼兵闻之莫不怀陛下好生宽惠之德而遂无拒战官军之心矣刘悟所以能一夕而擒斩师道者以三军之心皆以苦师道而思陛下之德故能不费日而成大功也此圣德之所不可及者一也今岁关中夏麦甚盛陛下哀民之穷困时下明诏放夏税约十万石朝臣相顾皆有喜色百姓歌乐遍於草野此谓圣德之所不可及者二也韩弘献女乐陛下却不受而赐之昔者鲁用孔子齐人恐惧遗之女乐季桓子受之君臣共观而三日不朝故孔子去鲁陛下超然独见遂以归之此圣德之所不可及者三也出李宗奭妻女於掖廷以庄宅却赐沈遵师圣明宽恕亿兆欣感者不可备纪若下诏出令一一皆类於此武德贞观不难及太平可反掌而致矣臣以为定祸乱者武功也能复制度兴太平者文德也非武功不能以定祸乱非文德不能以致太平今陛下既以武功平祸乱定海内能为其难者矣若革去弊事复高祖太宗之旧制用忠正而不疑屏邪佞而不近改税法不督【犯御名改下同】钱而纳布帛絶进献以宽百姓租税之重厚边兵以息蕃戎侵掠之患数引见待制之官问以时事以通壅蔽之路故用忠正而不疑则功德成屏邪佞而不近则视听聪明改税法不督钱而纳布帛则百姓足絶进献以宽百姓租税之重则下不困厚边兵以息蕃戎侵掠之患则天下安数引见待制官问以时事以通壅蔽之路则下情达凡此六者政之根本太平之所以兴陛下既已能行其难者矣又何惜不速其易为者乎以臣伏覩陛下上圣之姿也如不惑近习容悦之词选用骨鲠正直之臣与之修复故事而行之以兴太平可不劳而功成也若一日不以为事臣恐大功之後易生逸乐而羣臣进言者必曰天下既已太平矣陛下可以高枕而为宴乐矣若如此则高祖太宗之制度不可以复矣制度不复则太平未可以遽至矣臣窃惜陛下圣质当可兴之时而尚谦让未为也臣谨条疏兴复太平大略六事别白於後若行此六者五年不变臣必知百姓乐康蕃人入侍天垂景星地涌醴泉凤凰鸣於山林麒麟游於苑囿此无他和气之所感也诗曰先民有言询于刍蕘伏惟陛下明圣思博闻天下之事以助政理故臣敢忘其懦愚而尽忠焉无任感恩激切之至谨奉表以闻臣诚惶诚恐顿首顿首谨言

疏用忠正

臣闻国之所以兴者主能信任大臣臣能以忠正辅主故忠正者百行之宗也大臣忠正则小臣莫敢不为正矣小臣莫敢不为正则天下後进之士皆乐忠正之道矣後进之士皆乐行忠正之道是王化之本太平之事也今之语者必曰知人邪正是尧舜之所难也焉得知忠正之人而用之耶臣以为察忠正之人盖有术焉能尽言忧国而不希恩容者此忠正之徒也夫忠正之人亦各自有党类邪臣嫉而谗之必矣且以为相朋党矣夫舜禹稷契之相称赞也不为朋顔闵之相往来也不为党皆在於讲道德仁义而已邪人嫉而谗之且以为朋党用以惑时主之听从自古以来皆有之矣故萧望之周堪刘向谋退许史竟为邪臣所胜汉元帝不能辨而终任用邪臣汉室之衰始於元帝此不可不察也故听其言能数逆於耳者忠正之臣也虽任之杂以邪佞之臣则太平必不能成矣文宣王曰十室之邑必有忠信如丘者焉故忠信之人不难有也在陛下辨而用之各以类进之而已臣故曰用忠正而不疑则功德成

疏屏奸佞

臣闻孔子远佞人言不可以共为国也凡自古奸佞之人可辨也皆不知大体不怀远虑务於利己贪富贵固荣宠而已矣必好甘言谄辞以希人主之欲主之所贵因而贤之主之所怒因而罪之主好利则献蓄聚敛剥之计主好声色则开妖艷郑卫之路主好神仙则通烧链变化之术望主之色希主之意顺主之言而奉承之人主悦其不违於己因而亲之以至於事失怨生而不闻也若事失怨生而不闻其危也深矣自古奸邪之人未有不如此者也然则虽尧舜为君稷契为臣而杂之以奸邪之人则太平必不可兴而危事潜生矣所谓奸邪之臣者荣夷公费无极太宰嚭王子兰王凤张禹许敬宗杨再思李义府林甫卢杞裴延龄之比是也奸佞之臣信用大则亡国小则坏法度而乱生矣今之语者必曰知人邪正是尧舜之所难也焉得知其邪佞而去之邪臣以为察奸佞之人亦有术焉主之所欲皆顺不违又从而承奉先後之者此奸佞之臣也不去之虽用稷契为相不能以致太平矣故人主之任奸佞则耳目壅蔽耳目壅蔽则过不闻而忠正不进矣臣故曰屏奸佞而不近则视听聪明

疏改税法

臣以为自建中元年初定两税至今四十年矣当时绢一匹为钱四千米一斗为钱二百税户之输十千者为绢二匹半而足矣今税额如故而粟帛日贱钱益加重绢一匹价不过八百米一斗不过五十税户之输十千者为绢十有二匹然後可况又督其钱使之贱卖者耶假令官杂虚估以受之尚犹为绢八匹乃仅可满十千之数是为比建中之初为税加三倍矣虽明诏屡下哀恤元元不改其法终无所救然物极宜变正当斯时推本弊乃钱重而督之於百姓之所生也钱者官司所铸粟帛者农之所出今乃使农人贱卖粟帛易钱入官是岂非颠倒而取其无者耶由是豪家大商皆多积钱以逐轻重故农人日困末业日增一年水旱百姓菜色家无满岁之食况有三年之蓄乎百姓无三年之积而望太平之兴亦未可也今若诏天下不问远近一切令不督见钱皆纳布帛凡官司出纳以布帛为准幅广不得过一尺九寸长不过四十尺比两税之初犹为重加一尺然百姓自重得轻必乐而易输不敢复望如建中之初矣行

之三五年臣必知农人渐有蓄积虽遇一年水旱未有菜色父母夫妇能相保矣若税法如旧不速更改虽神农后稷复生教人耕织勤不失时亦不能跻於充足矣故臣曰改税法不督钱而纳布帛则百姓足

疏絶进献

臣以为自建中以来税法不更百姓之困已备於前篇矣今节度观察使之进献必曰军府美余不取於百姓且供军及留州钱各有定额若非兵士阙数不填及减刻所给则钱帛非天之所雨也非如泉之可涌而生也不取於百姓将安取之哉故有作官店以居商贾者有酿酒而官沽者其他杂率巧设名号是皆夺百姓之利亏三代之法公托进献因得自成其私甚非太平之事也比年天下皆厚留度支钱蓄兵士者以中原之有寇贼也今吴元济李师道皆梟斩矣中原无虞而蓄兵如故以耗百姓臣以为非是也若选达吏事之臣三五人往诸道与其节度使团练使言每道要留兵数以备镇守责其兵士见在实数因使其逃亡不补自可以每年十销一矣告之以中原无事蕃夷可虞每道宜配兵若干人取其衣粮以赐边兵而召战士使边兵实则蕃夷不足虑也夫钱帛皆国家之钱帛也宜作明法以取之是也若使通达吏事之臣往使焉虽其将帅之不诚荅者亦不敢有所隐矣今受进献则节度使团练使皆多方刻下为蓄聚其自为私者三分其所进献者一分也是岂非两税之外又加税焉百姓之所不乐其业而父子夫妇或有不能相养矣父子夫妇不能相养而望太平之兴虽妇人女子皆知其未可也臣故曰絶进献以寛百姓税租之重则下不困

疏厚边兵

臣以为方今中原无事其虑者蕃戎与北敌而已议者以为边备尚虚皆可忧矣兵法有之曰不恃敌之不来恃此之不可胜今国家威武达于四夷其不敢犯边为寇虽已明矣然蕃戎如犬羊也安识礼义而必其不为寇哉且去岁犯边足以明矣臣以为使缘边诸节度使特共召战士十万人每岁不过费钱一百万贯则边备实矣边上有召战之声达于四夷四夷心伏不敢为盗矣四夷不敢为盗边鄙之人得无兵战之苦则京师可高枕而卧矣

李文公集卷九

卷十

钦定四库全书

李文公集卷十

唐 李翱 撰

百官行状奏

右臣等无能谬得秉笔史馆以记注为职夫劝善惩恶正言直笔纪圣朝功德述忠臣贤士事业载奸臣佞人丑行以传无穷者史官之任也伏以陛下即位十五年矣乃元年平夏州二年平蜀斩辟三年平江东斩錡张茂昭遂得易定五年擒史宪诚得泽潞邢口七年田弘正以魏博六州来受常贡十二年平淮西斩元济十三年王承宗献德棣入管内租税除吏部十四年平淄青斩师道得十二州神断武功自古中兴之君莫有及者而自元和以来未着实録盛德大功史氏未纪忠臣贤士名德甚有可为法者逆臣贼人丑行亦有可为诫者史氏皆阙而未书臣实惧焉故不自量辄欲勉强而修之凡人之事迹非大善大恶则衆人无由知之故旧例皆访问於人又取行状諡议以为一据今之作行状者非其门生即其故吏莫不虚加仁义礼智妄言忠肃惠和或言盛德大业远而愈光或云直道正言歿而不朽曾不直叙其事故善恶混然不可明至如许敬宗李义府李林甫国朝之奸臣也使其门生故吏作行状既不指其事实虚称道忠信以加之则可以移之於房玄龄魏徵裴炎徐有功矣此不惟其处心不实苟欲虚美於所受恩之地而已盖亦为文者又非游夏迁雄之列务於华而忘其实溺於辞而弃其理故为文则失六经之古风记事则非史迁之实録不如此则词句鄙陋不能自成其文矣由是事失其本文害於理而行状不足以取信若使指事书实不饰虚言则必有人知其真伪不然者纵使门生故吏为之亦不可以谬作德善之事而加之矣臣今请作行状者不要虚说仁义礼智忠肃惠和盛德大业正言直道芜秽简册不可取信但指事说实直载其词则善恶功迹皆据事足以自见矣假令传魏徵但记其谏争之词足以为正直矣如传段秀实但记其倒用司农寺印以追逆兵又以象笏擊朱泚自足以为忠烈矣今之为行状者都不指其事率以虚词称之故无魏徵之谏争而加之以正直无秀实之义勇而加之以忠烈者皆是也其何足以为据若考功视行状之不依此者不得受依此者乃下太常并牒史馆太常定諡牒送史馆则行状之言纵未可一一皆信与其虚加妄言都无事实者犹山泽高下之不同也史氏记录须得本末苟凭往例皆是空言则使史馆何所为据伏乞下臣此奏使考功守行善恶之词虽故吏门生亦不能虚作而加之矣臣等要知事实辄敢陈论轻黷天威无任战越谨奏

陵庙日时朔祭议

徵事郎守国子博士史馆修撰臣李翱等谨献议曰国语曰王者日祭礼记曰王立七庙皆月祭之周礼不载日祭月祭惟四时之祭禴祠蒸尝汉朝皆杂而用之盖遭秦火诗书礼经烬灭编残简缺汉乃求之先儒穿凿各伸已见皆托古圣贤之名以信其语故其所记各不同也古

者庙有寝而不墓祭秦汉始建寝庙於园陵而上食焉国家因之而不改贞观开元礼并无宗庙日祭月祭之礼盖以日祭月祭既已行於陵寝矣故太庙之中每岁五享六告而已不然者房玄龄魏徵之辈皆一代名臣穷极经史岂不见国语礼记有日祭月祭之辞乎斯足以明矣伏以太庙之享笾豆牲牢三代之通礼是贵诚之义也园寝之奠改用常饌秦汉之制乃食味之道也今朔望上食於陵寝修秦汉故事斯为可矣若朔望上食於太庙岂非用常?味而贵多品乎且非礼所谓至敬不享味而贵气臭之义也传称屈到嗜芰有疾召其宗老而嘱之曰祭我必以芰及祭荐芰屈建命去芰而用羊馈笾豆脯醢君子是之言事祖考之义当以礼为重不以其生存所嗜为献盖明非食味也然则荐常饌於太庙无乃与荐芰为比乎且非三代圣王之所行也况祭器不设俎豆祭官不命三公执事者惟宫闈令宗正卿而已谓之上食可也安得以为祭乎且时享於太庙有司摄事祝文曰孝曾孙皇帝臣某谨遣太尉臣名敢昭告于高祖神尧皇帝祖妣太穆皇后窦氏时惟孟春永怀罔极谨以一元大武柔毛刚鬣明粢苾苾嘉蔬醴齐敬修时享以申追慕尚享此祝词也前享七日质明太尉誓百官於尚书省曰某日时享于太庙各扬其职不供其事国有常刑凡陪享之官散斋四日致斋三日然後乃可以为祭也宗庙之礼非敢擅议虽有知者其谁敢言故六十余年行之不废今圣朝以弓矢既囊礼乐为大故下百僚使得详议臣等以为贞观开元礼并无太庙上食之文以礼节情罢之可也至若陵寝上食采国语礼记日祭月祭之词因秦汉之制修而存之以广孝道可也如此则经义可据故事不遗大礼既明永息异论可以继二帝三王而为万代法与其黷礼越古贵因循而憚改作犹天地之相远也谨议

与本使李中丞论陆巡官状

古人有言君之视臣如犬马则臣之视君如国人君之视臣如土芥则臣之视君如仇讐上之所以礼我者厚则我之所以报者重故豫让以衆人报范中行而漆身吞炭以复赵襄子之讐其所以待之各不同也阁下既尝罚推官直矣又将请巡官状矣不识阁下将欲为能吏哉将欲为盛德哉若欲为能吏即故江西李尚书之在江西是也阁下如此行之不为过矣若欲为盛德亦惟不惜听九九之说或冀少以裨万一阁下既罚推官直又请陆巡官状独不虑判官辈有如穆生者见醴酒不设遂相顾而行乎陆巡官处分所由不得于使院责状科决而於宅中决地界虞候是初仕之未适中也阁下既与之为知己矣召而教之可也不从退之可也若判令通状但恐阁下之所失者无乃大於陆巡官乎翱受恩於阁下也深而与陆巡官之交尚浅其所深者诚欲阁下之为全德也若信其所言即伏望使人收取元判召而语之闔府宾寮孰不幸甚如以为小生之言不足听也我富贵人也何为而不可哉即敢不惟公命翱再拜

与本使杨尚书请停修寺观钱状

伏见修寺疏阁下出钱十万令使院共出十万以造石门大雪寺佛殿翱性本愚闻道晚窃不谕阁下以为敛钱造寺必是耶翱虽贫愿竭家财以助阁下成如以为未必是耶阁下官尊望重凡所举措宜与後生为法式安可举一事而不中圣贤之道以为无害於理耶天下之人以佛理证心者寡矣惟土木铜铁周於四海残害生人为逋逃之藪泽阁下以为如有周公仲尼兴立一王制度天下寺观僧道其将兴之乎其将废之乎若将兴之是符融梁武皆为仲尼周

公也若将废之阁下又何患其尚寡而复率其属合力建置之也院中判官虽副知己之命然利禄远仕亦不以贪也岂无羈孤亲友犹未能力及调之欤何暇出钱以兴有损无益之务衆情不厌但奉阁下之命而为耳拳拳下情深所未晓伏惟悯其拙浅不惜教诲若阁下所为竟是翱亦安敢守初心以从而不为也若其所言有合於道伏望不重改成之事而轻为後生之所议论意尽辞直无任战越

再请停率修寺观钱状

率修寺观钱事前後已两度咨闻伏请停罢前奉处分云要与换寺观家人院蒲藿屋以为火备此後任停既已计料支給讫後奉处分又云且更待一两月者伏以前件钱於公家无补但实置税名公议所非为日固久不厌尚实但苟思壮丽城池开化源孰大於此若阁下尚不改易则弊终无已何特爱於此因循未革自仲尼既歿异学塞途孟子辞而辟之然後廓如也佛法害人甚於杨墨论心术虽不异於中土考较迹实有蠹於生灵浸溺人情莫此之甚为人上者所宜抑焉阁下去年考制策其论释氏之害於人者尚列为高等冀感悟圣明岂不欲发明化源抑絶小道何至事皆在己而所守遂殊知之不难行乃为贵况使司税额悉以正名幸当职司敢不备举伏见朝廷故事一人所见或不足以定是非者即下都省衆议则物情获申衆务皆理倘翱见解凡浅或未允从院中羣公皆是材彦伏乞令使院详议惟当是从理屈则伏不敢徇己实下情所望累有尘黷无任战栗翱再拜

论故度支李尚书事状

故度支李尚书之出妻也续有勅停官及薨亦无追赠当时将谓去妻之状不直明白无可疑者故及此近见当使采石副使刘侍御说朝廷公议皆云李尚书性猜忌甚於李益而出其妻若不缘身病即合左降翱尝从事滑州一年有余李尚书具能详熟李尚书在滑州时收一善歌妇人陶芳於中门外处之於後陶芳与主钥厅子有过既发李尚书召问厅子既实告之曰吾从若父所将若来故不能杖若吾非怒而不留若既犯此即自於军中不便若远归父所慎无他往遂斥陶芳於家而不罪也当时翱为观察判官卢侍御宪曰此事在衆人必怒而罪之在中道即罪之而不怒大夫虽未足以为教然亦可谓难能也推此以言即性猜忌不甚於河南李少尹详矣刘侍御又说朝廷公议云李尚书之在滑州也故多畜媵遂断送其妻入京以遂所欲翱又能明其不然李尚书有二子仕於京师奏请至滑纳妻德宗皇帝勅奏事军将张瓘曰与卿本使无外往告卿本使可令妻及新妇家来就上都为婚亦有手诏李尚书遂发二新妇及妻入京以奉诏二男既成婚其妻遂归滑州自陶芳之外更无妾媵况李尚书将畜女媵不假令妻入京推此以言即与朝廷公议之不同也如此翱以为古人之逐其臣也必可使复事君去其妻也必可使复嫁虽有大罪犹不忍彰明必为可辞以去之也故曾参之去妻也以蒸梨不熟孟轲之去妻也以恶败鲍永之去妻也以叱狗姑前此皆以事辞而去之也李尚书於此二事外犹有他过即非翱所知也若公议所责祇如刘侍御之传则翱据所目见而辨也章然如前所陈矣凡人家中门内事外人不可周知偏信一党亲族之言以为公议即不知是议之果为公耶私耶未可知也以阁下所闻倘犹有加於是者不惜示及如或祇如前两说伏望不重改既往之论而明之於朝廷使非实之谤罢传说於人间既没之魂不衔冤於泉下

幸甚幸甚翱於李尚書初受顧惠及其去選也客主之義亦不得如初歡矣茲所陳者但樂明人之屈而正之耳伏計不以為黨謹狀

李文公集卷十

卷十一

钦定四库全书

李文公集卷十一

唐 李翱 撰

故正议大夫行尚书吏部侍郎上柱国赐紫金鱼袋赠礼部尚书韩公行状

曾祖泰皇任曹州司马祖濬素皇任桂州长史父仲卿皇任秘书郎赠尚书左仆射公讳愈字退之昌黎某人生三岁父歿养於兄会舍及长读书能记他生之所习年二十五上进士第汴州乱诏以旧相东都留守董晋为平章事宣武军节度使以平汴州晋辟公以行遂入汴州得试秘书省校书郎为观察推官晋卒公从晋丧以出四日而汴州乱凡从事之居者皆杀死武宁军节度使张建封奏为节度推官得试太常寺协律郎选授四门博士迁监察御史为幸臣所恶出守连州阳山令政有惠於下及公去百姓多以公之性命其子改江陵府法曹军入为权知国子博士宰相有爱公文者将以文学职处公有争先者构公语以非之公恐及难遂求分司东都权知三年改真博士入省为分司都官员外郎改河南县令日以职分辨於留守及尹故军士莫敢犯禁入为职方员外郎华州刺史奏华阴县令柳涧有罪遂将贬之公上疏请发御史辨曲直方可处以罪则下不受屈既柳涧有犯公由是复为国子博士改比部郎中史馆修撰转考功郎中修撰如故数月以考功知制诰上将平蔡州先命御史中丞裴公度使诸军以视兵及还奏兵可用贼势可以灭颇与宰相意忤既数月盗杀宰相又害中丞不克中丞微伤马逸以免遂为宰相以主东兵自安禄山起范阳陷两京河南北七镇节度使身死则立其子作军士表以请朝廷因而与之及贞元季年虽顺地节将死多即军中取行军副使将授以授之节习以成故矣朝廷之贤恬於所安以苟不用兵为贵议多与裴丞相异惟公以为盗杀宰相而遂息兵其为懦甚大兵不可以息以天下力取三州尚何不可与裴丞相议合故兵遂用而宰相有不便之者月满迁中书舍人赐绯鱼袋後竟以他事改太子右庶子元和十二年秋以兵老久屯贼未灭上命裴丞相为淮西节度使以招讨之丞相请公以行於是公兼御史中丞赐三品衣鱼为行军司马从丞相居於鄆城公知蔡州精卒悉聚界上以拒官军守城者率老弱且不过千人亟白丞相请以兵三千人间道以入必擒吴元济丞相未及行而李愬自唐州文城垒提其卒以夜入蔡州果得元济蔡州既平布衣柏耆以计谒公公与语奇之遂白丞相曰淮西灭王承宗胆破可不劳用衆宜使辨士奉相公书明祸福以招之彼必服丞相然之公令柏耆口占为丞相书明祸福使柏耆袖之以至镇州承宗果大恐上表请割德棣二州以献丞相归京师公迁刑部侍郎岁余佛骨自凤翔至传京师诸寺时百姓有烧指与顶以祈福者公奏疏言自伏羲至周文武时皆未有佛而年多至百岁有过之者自佛法入中国帝王事之壽不能长梁武帝事之最谨而国大乱请烧弃佛骨疏入贬潮州刺史移袁州刺史百姓以男女为人隶者公皆计佣以偿其直而出归之入迁国子祭酒有直讲能说礼而陋容学官多豪族子摈之不得共食公命吏曰召直讲来与祭酒共食学官由此不敢贱直讲奏儒生为学官日使会讲生徒多奔走听闻皆喜曰韩公来为祭酒国子监不寂寞矣改兵部侍郎

镇州乱杀其帅田弘正征之不克遂以王庭凑为节度使诏公往宣抚既行衆皆危之元稹奏曰韩愈可惜穆宗亦悔有诏令至境观事势无必於入公曰安有受君命而滞留自顾遂疾驱入庭凑严兵拔刃弦弓矢以逆及馆甲士罗於庭公与庭凑监军使三人就位既坐庭凑言曰所以纷纷者乃此士卒所为非庭凑心公大声曰天子以为尚书有将帅材故赐之以节实不知公共健儿语未尝及大错甲士前奋言曰先太史为国打朱滔滔遂败走血衣皆在此军何负朝廷乃以为贼乎公告曰儿郎等且勿语听愈言愈时为儿郎已不记先太史之功与忠矣若犹记得乃大好且为逆与顺利害不能远引古事但以天宝来祸福为儿郎等明之安禄山史思明李希烈梁崇义朱滔朱泚吴元济李师道复有若子若孙在乎亦有居官者乎衆皆曰无又曰令公以魏博六州归朝廷为节度使後至中书令父子皆授旌节子与孙虽在幼童者亦为好官穷富极贵宠荣耀天下刘悟李佑皆居大镇王承元年始十七亦仗节此皆三军耳所闻也衆乃曰田弘正刻此军故军不安公曰然汝三军亦害田令公身又残其家矣复何道衆乃謹曰侍郎语是庭凑恐衆心动遽麾衆散出因泣谓公曰侍郎来欲令庭凑何所为公曰神策六军之将如牛元翼比者不少但朝廷顾大体不可以弃之耳而尚书久围之何也庭凑曰即出之公曰若真耳则无事矣因与之宴而归而牛元翼果出乃还於上前尽奏与庭凑言及三军语上大悦曰卿直向伊如此道由是有意欲大用之王武俊赠太师呼太史者燕赵人语也转吏部侍郎凡令史皆不锁听出入或问公公曰人所以畏鬼者以其不能见也鬼如可见则人不畏矣选人不得见令史故令史势重听其出入则势轻改京兆尹兼御史大夫特诏不就御史台谒後不得引为例六军将士皆不敢犯私相告曰是尚欲烧佛骨者安可忤故盗贼止遇旱米价不敢上李绅为御史中丞械囚送府使以尹杖杖之公曰安有此使归其囚是时绅方幸宰相欲去之故以台与府不协为请出绅为江西观察使以公为兵部侍郎绅既复留公入谢上曰卿与李绅争何事公因自辨数日复为吏部侍郎长庆四年得病满百日假既罢以十二月二日卒於靖安里第公气厚性通论议多大体与人交始终不易凡嫁内外及交友之女无主者十人幼养於嫂郑氏及嫂歿为之葺服以报之深於文章每以为自扬雄之後作者不出其所为文未尝效前人之言而固与之并自贞元末以至於兹後进之士其有志於古文者莫不视公以为法有集四十卷小集十卷及病遂请告以罢每与交友言既终以处妻子之语且曰某伯兄德行高晓方药食必视本草年止於四十二某疎愚食不择禁忌位为侍郎年出伯兄十五岁矣如又不足於何而足且获终於牖下幸不至失大节以下见先人可谓荣矣享年五十七赠礼部尚书谨具任官事迹如前请牒考功下太常定諡并牒史馆谨状

唐故金紫光禄大夫捡校礼部尚书使持节都督广州诸军事兼广州刺史兼御史大夫充岭南节度营田观察制置本管经略等使东海郡开国公食邑二千户徐公行状

曾祖仁彻隋吉州太和县丞祖玄之皇考功员外郎赠吏部郎中谏议大夫考义皇汾州司户参军赠信州刺史京兆府万年县青盖乡交原里东海徐公年七十一公讳申字维降东海剡人永泰元年寄籍京兆府举进士秘书省正字初辟巡官於江西又掌书记于岭南行营哥舒氏之乱平奏授大理评事转司直兼监察御史赐绯鱼袋又充节度判官于朔方改太子司议郎兼殿中侍御史选授洪州大都督府长史时刺史嗣曹王举江西兵讨李希烈故以长史行刺史事任职有成曹王荐之迁韶州刺史四十余年刺史相循居于县城州城与公田三百顷皆为墟县令丞尉杂处民屋公乃募百姓能以力耕公田者假之牛犂粟种与食所收其半与

之不假牛犂者叁分与貳田久不理草根腐地增肥又连遇宜岁得粟比余田亩盈若干凡积粟三万斛将复筑室于州故城令百工之伎以其艺来者与粟有差刺史临视给与吏无所行其私以故人皆便信应募者数千人陶人不知墁而涂有余圻人不板筑而墙有余筑人不操斤斧而工有余陶者圻者筑者工者各以其所能相易未十旬而城郭室屋建立如初刺史以官属迁于新城县令之下各返其室创六驿新大市二道四馆器用皆具曲江县五百人以状诣观察使请作碑立生祠公自陈所为不足述假令如百姓言乃刺史职宜如此何足多者不愿以小事市名观察使嘉其让密以状闻迁合州刺史其始来也韶之人户仅七千凡六年迁合州其去也倍其初之数又盈四千户焉初先夫人歿于江西遭贼难未克返葬寓於西原公不赴合州表请奉丧归祔于河南府偃师县既沧景观察使奏请景州刺史阙其帅辄以其僚属将校自为之不请有年矣宰相累进刺史名皆不出及召公入言合上旨遂下诏迁朝散郎使持节景州诸军事景州刺史充本州团练使兼御史中丞赐紫金鱼袋加节度副使其明年沧景节度使始朝二年又朝遂留诏以其从父兄代之奏以公充行军司马公遂以信州府君莹近漕河表求改葬於重山诏许之既徵入京师迁朝散大夫使持节都督邕州诸军事守邕州刺史本管经略招讨使御史中丞赐紫如初是岁贞元十七年也诘里盗除其暴掠良聚攻禁下如令通蛮夷道责土贡大首领黄氏帅其属纳质供赋黄氏周氏韦氏依氏皆羣盗也黄氏之族最强盘亘十数州周韦氏之不附之也率羣黄之兵以攻之而逐诸海黄氏既至羣盗皆服於是十三部二十九州之蛮宁息无寇害其明年制迁使持节都督广州诸军事守广州刺史兼御史大夫充岭南节度观察处置本管经略等使散官如故前节度使歿掌印吏盗授人职百数谋夜发兵为乱事觉奔走公至陰以术得首恶杀之不问其余军中以安蛮夷俗相攻劫羣聚缘道发辄捕斩无复犯者蕃国岁来互市奇珠璫异香文犀皆浮海舶以来常贡是供不敢有加舶人安焉商贾以饶二十一年进阶银青光禄大夫元和元年诏加金紫光禄大夫捡校礼部尚书封东海郡开国公食邑二千户余如故诏书未至有疾薨于位凡三佐藩屏之臣五为刺史一为经略使一为节度观察使阶累升为金紫光禄大夫爵超进为开国公官亟迁为礼部尚书其事业皆足以传示後嗣为子孙法享年七十虽不登於上壽儒者荣之前夫人渤海高氏子皆天後夫人扶风窦氏封国夫人有子元弼前右卫仓曹参军以读书属文为业谨具历官行事如前伏请牒太常编録谨状

皇祖实録

公讳楚金谿议诏第二子明经出身初授卫州参军又授贝州司法参军夫人清河崔氏父球兖郛怀三州刺史公伯兄惟慎大原府壽阳县丞性旷达乐酒不理家产每日賣钱一千出游求饮酒者必尽所賣然後归其饮酒徒善草隶书张旭其人也公事壽阳如父在每事必请於壽阳壽阳曰汝年亦长矣若都不能自治立然每事必扰我何为公曰不请非不能为此也不滿乎人心其请如初及在贝州刺史严正晦禁官吏於其界市易所无公至官之日养生之具皆自卫州车以来又以二千万钱入曰吾食贝州水而已及正晦黜官百姓旧不乐其政将俟其出也羣聚号呼毙之以瓦石扬言无所畏忌録事参军不敢禁惧谓公曰若之何公曰録事必不能当请假归摄録事参军斯可矣乃如之公告正晦曰若以威强不便於百姓百姓俟使君行加害於使君使君更期出某为使君任其患於是集州县小吏得百余人皆持兵无兵者持朴埋长木於道中令曰使君出百姓敢有出观者杖杀大木下及正晦出百姓莫敢动或曰

刺史出可作矣如李司法何贝州震恐後刺史至委政於公奸吏皆务以情告不敢隐贝州於是大理壽阳之夫人郑氏贤知於族尝谓壽阳曰某观叔贤於君某之质不敢与叔母争高下君之家和子孙必有兴者壽阳之第一子为户部侍郎初户部氏兄弟五人妹一人其丧母也皆幼公每日必抱置膝上或泣而伤诸侄之安於叔母也如未失母时有子三人曰某只承父业不敢弗及夫人清河崔氏能以柔顺接于亲族其来归也皆自以为己亲焉翱生不及祖不得备闻其景行其贝州事业亲授之於先子其余皆闻之於户部叔父伏以皇祖之为子弟时若不能自任也及泄官行事其刚勇不同也如此其行事皆可以传於後世为子孙法盖闻先有祖善而不知不明也知而不传不仁也翱欲传惧文章不足以称颂道德光耀来世是以顿首愿假辞於执事者亦惟不弃其愚而为之传焉

李文公集卷十一

卷十二

<集部,别集类,汉至五代,李文公集>

钦定四库全书

李文公集卷十二

唐 李翱 撰

高愍女碑

愍女姓高妹妹名也生七岁当建中二年父彦昭以濮阳归天子前此逆贼质妹妹与其母兄而使彦昭守濮阳及彦昭以城归妹妹与其母兄皆死其母李氏也将死怜妹妹之幼无辜请独免其死而以为婢於官皆许之妹妹不欲曰生而受辱不如死母兄且皆不免何独生为其母与兄将被刑咸拜于四方妹妹独曰我家为忠宗党诛夷四方神祇尚何知问其父所在之方西向哭再拜遂就死明年太常諡之曰愍当此之时天下之为父母者莫不欲愍女之为其子也天下之为夫者闻之莫不欲愍女之为其室家也天下之为女与妻者闻之莫不欲愍女之行在其身也昔者曹娥思盱自沉于江狱吏呼囚章女悲号思唁其兄作诗载驰缙紫上书廼除肉刑彼四女者或孝或智?义或仁噫此愍女厥生七年天生其知四女不伦向遂推而布之於天下其谁不从而化焉虽有逆子必改行虽有悍妻必易心赏一女而天下劝亦王化之大端也异哉愍女之行而不家闻户知也贞元十三年翱在汴州彦昭时为颍州刺史昌黎韩愈始为余言之余既悲而嘉之於是作高愍女碑

杨烈妇传

建中四年李希烈陷汴州既又将盗陈州分其兵数千人抵项城县盖将掠其玉帛俘累其男女以会於陈州县令李侃不知所为其妻杨氏曰君县令寇至当守力不足死焉职也君如逃则谁守侃曰兵与财皆无将若何杨氏曰如不守县为贼所得矣仓廩皆其积也府库皆其财也百姓皆其战士也国家何有夺贼之财而食其食重赏以令死士其必济于是召胥吏百姓於庭杨氏言曰县令诚主也虽然岁满则罢去非若吏人百姓然吏人百姓邑人也坟墓存焉宜相与致死以守其邑忍失其身而为贼之人耶衆皆泣许之乃徇曰以瓦石中贼者与之千钱以刀矢兵刃之物中贼者与之万钱得数百人侃率之以乘城杨氏亲为之爨以食之无老少必周而均使侃与贼言曰项城父老义不为贼矣皆悉力守死得吾城不足以威不如亟去徒失利无益也贼皆笑有蜚箭集于侃之手侃伤而归杨氏责之曰君不在则人谁肯固矣与其死于城上不犹愈於家乎侃遂忍之复登陴项城小邑也无长戟劲弩高城深沟之固贼气吞焉率其徒将超城而下有以弱弓射贼者中其帅坠马死其帅希烈之壻也贼失势遂相与散走项城之人无伤焉刺史上侃之功迁绛州太平县令杨氏至兹犹存妇人女子之德奉父母舅姑尽恭顺和於姊姒於卑幼有慈爱而能不失其贞者则贤矣至於辨行阵明攻守勇烈

之道此公卿大臣之所难厥自兵兴朝廷宠旌守御之臣凭坚城深池之险储蓄山积货财自若冠胄服甲负弓矢而驰者不知几人其勇不能战其智不能守其忠不能死弃其城而走者有矣彼何人哉杨氏者妇人也孔子曰仁者必有勇杨氏当之矣

赞曰凡人之情皆谓後來者不及於古之人贤者自古亦稀独後代耶及其有之与古人不殊也若高愍女杨烈妇者虽古烈女其何加焉予惧其行事湮灭而不传故皆叙之将告於史官

故东川节度使卢公传

卢坦字保衡河南人父岌赠郑州刺史坦少孤初任韩城县尉历宣城巩河南三县尉其更河南知捕贼杜黄裳为河南尹谓坦曰某家子与恶人游破旧产公为捕贼盍使察之坦对曰凡居官终始廉白只入俸钱者虽历大官亦无厚畜以传其能多积财者必剥下以致如其子孙善守之是天富不道人家也不若恣其不道以归於人坦以为宜故不使察黄裳惊视因使升就堂坐自此日加重及黄裳为吏部侍郎将授以太常博士会郑滑节度使李复表请为判官得监察御史薛盈珍为监军使累侵军政坦每据理以拒之盈珍尝言曰卢侍御所言皆公我故不违也有善吹笛者大将十余人同啓复请以为重职坦适在复所复问曰衆所请可许否坦笑曰大将等皆久在军积劳亟迁以为右职奈何自薄欲与吹笛少年同为列耶复告诸将曰卢侍御言是也大将慙遽走出就坦谢且曰向闻侍御言某等羞愧汗出恨无穴可入李复病甚盈珍以甲士五百人入州城人皆恐骇坦遽止之盈珍不敢违复卒盈珍主兵事制以姚南仲代盈珍方会客言曰姚大夫书生岂将材也坦私谓人曰姚大夫外虽柔中甚刚又能断监军若侵必不受祸自此萌矣若从公丧而西必遇姚大夫吾惧为所留以及祸遂潜去姚果以牒来请终以不逢得解及盈珍与姚隙从事多黜死者王纬观察浙西兼盐铁使请坦为转运判官及李錡代请如初转殿中侍御史錡所行多不循法坦每争之词切深听者皆为之惧累求去不得凡在錡府七年官不改錡恶状滋大坦虑及难又非可以力争遂与裴度李约李陵继以罢去後数年诏追錡入錡遂扇兵士杀留後以留已因发兵取宣州为其将所擒送斩死顺宗皇帝寝疾王叔文居翰林决大政天下嚮嚮坦说宰相韦执谊速白立皇太子以树国本执谊深纳其言将以为殿中侍御史时御史中丞亦以为请王叔文使人请坦将以为员外郎知杨子留後坦假他词不受叔文不悦故事皆不行及王叔文贬出坦遂为殿中侍御史权德舆为户部侍郎请为本司员外郎转库部兼侍御史知杂事未久迁刑部郎中知杂事如故赤县尉有为御史台所按者京兆尹密救之上使品官释之坦时在宅台吏以告坦白中丞请覆奏然後奉诏品官遂以闻上曰吾固宜先命所司遂使宣诏乃释数月迁御史中丞赐紫衣分司东都寻归西台初上禁絶罢鎮节度使等献财货载於赦条时山南节度使柳晟浙东观察使阎济美皆罢镇有所献坦劾奏之晟济美皆白衣待罪上召坦谓曰柳晟阎济美所献皆家财非刻下卿勿劾坦对曰陛下所以布大信於天下者赦令是也且两臣首违诏臣职当举奏陛下不可以失大信於天下上曰朕已受之矣如何坦曰出归有司以明陛下之德上善之竟为宰相所寝李錡之诛有司将自淮安王之下坟墓皆毁之宰相不敢言坦奏曰李錡与国同族其反逆不道身既斩死并杀其子罪塞矣若将追毁祖父坟墓臣以为不可淮安王有佐命之功且国贞又死王事汉诛霍禹不毁霍光之坟房遗爱伏诛罪不追於玄龄此前代及圣朝之故事也康诰曰父子兄弟罪不相及若将易之无乃罪及良臣且伤大体乎上改容曰

非卿言何由知遂命停毁仍禁樵采给五户守淮安王之坟以示不忘其功上策贤良方正之士有怀书策入者将深罪之坦奏言四方不明知所犯必以为策词抵忤宜轻其责上从之江宁节度使裴垍入为仆射行香时将处谏议常侍之上坦引故事及姚南仲近例以为证裴垍怒曰姚南仲何足为例耶坦应曰姚仆射但不是勅使耳何不足以为例也遂为垍所排改左庶子坦初为殿中当杜黄裳为相故累迁凡二十有三月而至中丞及居官守道正言日闻而人忌其迁之速数月宰相裴垍白以为宣歙池等州都团练观察处置使兼御史中丞宣州刺史刘辟反逆其壻苏强坐诛死强兄弘为晋州从事自免归人莫敢用坦奏言苏弘有才行其弟强坐刘辟反诛弘与强相去三千里必不通谋以强废弘非陛下惜材之志因请弘以为判官上曰假令苏强当时不就诛尚宜随材而任之况在其兄耶遂得请及在宣州江淮大旱米价日长或说节其价以救人坦曰宣州地狭谷不足皆他州来若制其价则商不来矣价虽贱如无谷何後米斗及二百商人舟米以来者相望坦乃借兵食多出於市以平其直人赖以生当涂县有渚田久废坦以为岁旱苟贫人得食取佣可易为功於是渚田尽辟藉佣以活者数千人又以羡钱四十万代税户之贫者故旱虽甚而人忘灾五年冬迁刑部侍郎充诸道盐铁转运使减冗职八十员自江之南补置付之院监使无所与数月转户部侍郎判度支坦历更重位以朝廷是非大体为己务故多所陈请或上封告泗州刺史薛謩为代北水运使时畜马四百匹有异马不以献者事下度支乃使巡官往验之未反上迟之使品官刘泰昕按其事坦上陈以为陛下既使有司验之又使品官往岂大臣不足信於品官乎臣请先罢免疏三奏上是之遂追刘泰昕旧赋於州郡者或非土地所有则厚价以市之他境坦悉条奏各去其所无罢宣歙度支米收其价以移之於湖南免江南鹿腊配之鄜汝州以韩重华为代北水运使开废田列栅二十益兵三千人岁收粟二十万石八年西受降城为河所坏城使周怀义上言宰相议徙天德故城坦以受降城张仁亶所筑城当磧石得制北狄之要若避河流宜退三数里其费不多天德故城北倚山去河甚远失制虏要地非便因使水运使察视远近利病以图进上使品官强文采覆之文采言与坦合上召坦使条陈将行之竟为宰相所夺乃出坦为劔南东川节度使周怀义数月忧卒燕重晖代其位遂移天德故城军士归怨因杀重晖夺其家初坦与宰相李绹议论多合绹藉以为已助及坦出半岁而绹罢坦至东川奏罢两税及山泽盐井榷率之籍夷人歌之锦劔二州有通文成州路每岁奏发二千兵以防西蕃其实不过一二百人坦乃奏於冲地置戍镇之上诛蔡州诏发兵二千人於安州每朔望使人问其父母妻子其有疾者与之药故兵士皆感恩而无逃者及薨赠礼部尚书

卷十三

钦定四库全书

李文公集卷十三

唐 李翱 撰

唐故特进左领军卫上将军兼御史大夫平原郡王赠司空柏公神道碑

柏氏系自有周叔虞封晋其支子有受邑於伯为采地者因以为姓後世生宗宗以直显景公厉公之时三却恶宗共譖杀之其客毕阳以其子州黎奔楚於是改伯为柏及汉有鸿者由议郎为魏郡守子孙家焉故为魏郡也有季纂者入唐为工部尚书生敬仁为蕲州长史生謩为河南永宁令赠大理少卿生造为怀之获嘉令即公之父也公讳良器字公亮生十二年安禄山陷东郡获嘉守县印不去为贼将所害公既免丧怀平志乃学擊劒依父友王奂奂尝曰汝额文似李临淮面黑子似顔平原其必立临淮即太尉光弼也年十七得汝州龙兴尉王奂从事太尉府荐之太尉召与言遂授以兵使平安越之盗累授左武卫中郎将以所将兵隶於浙西广德岁中盗陷江东十州公帅所将兵来婺州功多进左武卫将军平方清於洞中赐钱五百万破张三霸海上改左金吾卫将军为都知兵马使大历初潘狩虎据小伤胡参据蒸里江东大扰公将卒三千人骑五百人与战皆破之斩首三千级执俘一千人诏加捡校光禄大夫兼苏州别驾又加左羽林大将军试殿中监察御史李栖筠问公年对曰二十有四战阵几何曰六十有二李公叹曰相识甚近得公甚深勉哉公泣涕谢曰遭时丧乱父死家破誓弃性命以除寇讐私志未立岂敢望为明公之所知哉建中初尝至京师宰相杨炎召之语公因言两河有事职税所办者惟在江东李道昌无政宜速得人以代之炎许诺其冬遂并宣越与浙西以为一而以晋州刺史韩滉代道昌焉及德宗如梁州李希烈陷汴州逐李勉遂僭帝号寇陈州围宋宁陵滉使公将卒万人救陈并宁陵是时刘玄佐败于白塔收其卒保宋州使将王彦昭守宁陵希烈拥水灌其南筑埽道亲临其北令军中曰明日日中陷城公闻之厉所将兵成阵以进恐城陷不及使弩手善游者五百人沿汴渠夜进去城数里没于水中遂得入及旦贼驱勇卒登城城中伏弩悉发皆贯人毙其後希烈始知救兵得入杀守将因罢去将昌集城中人哭曰向非浙西救至则此城已屠矣遂拔襄邑收漳口宋州由是获全李希烈遂失汴州奔於蔡诏封平原郡王食邑三千户特进兼御史中丞贞元二年淮西平诏曰休勲茂伐书於竹帛戎籍乃为裨将副非所以褒功宠德也其以为左神策军将军知军事兼官如故五年诏与太尉晟侍中城等三十六人图形於凌烟阁上亲御即其形而赞之八年迁大将军士卒之在市贩者悉挥斥去募勇者代之故为所监者不悦明年公之故人有犯禁宿於望仙门者卫使奏言遂转右领军卫大将军所监者乃用其衙将魏循代为将军自是军中之政不复在於将军矣十五年兼英武将军使十八年迁左领军兼御史大夫十九年闰十月以疾卒年六十一天子为之废朝赠陕州大都督明年葬于万年毕原夫人康氏先歿後始附葬有子曰元封为蔡州刺史曰耆为谏议大夫曰元凤为澄城主簿曰夔为襄州参军三女皆幼以元封及耆累赠为司空夫人追封魏国太夫人初公与王栖曜李长荣皆事韩晋公栖曜至鄜坊长荣至河

阳泽潞皆拥节有土公自少即戮力破贼及壮解宁陵猗杖之围希烈之所以兵不及於宋而江东以全者实公之所为也功?高位独以不副克生良子能大厥家大和元年翱自庐以谏议大夫徵路出於蔡元封泣拜且曰先公之碑未树教後嗣其果有辞俟也公不可听乃铭曰

公生十二未壮家毁誓殄父讐不恹勇死释官就军焯有其勲擒凶盗平威明显闻人谁不贵孰胜其位由卑至巨莫匪躬致宜疏土疆报未功当是生後人绍庆不忘

唐故横海军节度齐棣沧景等州观察处置?使金紫光禄大夫捡校兵部尚书使持节齐州诸军事兼齐州刺史御史大夫上柱国贝郡开国公食邑二千户赠左仆射傅公神道碑

傅为古姓介子诛楼兰王封义阳侯俊为二十八将功高称於两汉而毅以文章显自汉以降世累有人曾祖諫易州长史生大父定州司马韶赠邓州长史生父荣赠刑部尚书公讳良弼字安道清河人也以善弓矢显仕於成德军流辈称其朴厚博野乐壽本隶瀛州在范阳成德间为要害地每相攻以取两城及王武俊破走朱滔诏以博野乐壽与成德军其後以公选为将而镇於乐壽公善抚士卒与之同苦乐得士卒死力长庆初幽州继乱范阳执其帅弘靖而扶克融成德杀其帅弘正将廷湊因盗有地公奋曰吾岂可以为贼乎遂誓衆喻以逆顺闭城拒贼潜疏以闻诏以乐壽为神策行营命公以为都知兵马使与深州将牛元翼博野李寰犄角相应贼屡攻之卒不能克会诏下以克融廷湊皆为节度使公遂将乐壽之师及其妻子拔城以出贼转鬪且引遂遇官军以免於难以功迁沂州刺史未到遽以为左神策军将军数月拜郑州刺史公本用武力进未尝治人於是痛自刻凜清已率下凡从公将卒本与公同立於乐壽者皆飭惧不敢越条令以侵物故郑州称理虽他时文吏罕能过者明年改为盐州刺史闵帝初以公为夏银绥宥等州节度使居河阳濡民不耕织党项千余落以畜牛羊马代田业先时将帅多贪至有盗其善马者蕃落咸怨走以出他境及公之至蕃人来见或献马者公拒而不受蕃人喜传以相告未踰月而部落相劝皆归蕃人之有罪者惧而来奔故事皆使蕃人出马以赎公曰吾将於此职当禁其逃亡有罪何俟於赎皆执之以付其蕃落蕃人益喜大和二年九月以公为横海军节度使捡校兵部尚书俾治齐州以图沧景之寇知兵者咸以为命将之当必且有成矣旌旗及於陕而得疾疾愈即路以十月晦薨于硖石驿春秋五十有六天子悼痛为之废朝赠尚书左仆射以明年七月葬河南府洛阳县伯乐里夫人南阳张氏柔立善断公之以乐壽拒贼暨转战以出夫人麤衣粝食与兵士妻女均好恶用助公事再封南阳郡夫人三子守常守中守章等皆孝谨寡过公方将立大功以报於国不以男子之仕为念故官甚卑有未官者铭曰

大夫致身不赖前业遭变竭忠奇节晬晬乃作刺史乃作将军乃统边兵事绩昭闻廉以捡已严以督下藩落完安马牛在野大革前事自我为初尔後之来视此勿渝

陆歙州述

吴郡陆惨公佐生于世五十有七年明于仁义之道可以化人伦厚风俗者余三十年连事观察使观察使不能知退居於田者六七年由侍御史入为祠部员外郎二年出刺歙州卒于道

贞元十八年四月二十八日也。凡人之所以不能穷者，必推之於天。天之注膏雨也，人之心以为生旱苗然也。雨与苗运相违，或雨於海，或雨於山，旱苗不得仰其泽，惟人也。亦然，天之生俊贤也。人之心以为拯顛頫之人然也。贤者与顛頫之人，时不合，或死于野，或得其位，而道不能行。顛頫之人，不得被其惠，膏雨之降也，适然。贤者之生于时也，亦然。运相合，旱苗仰其泽，顛頫之人，赖其力。传说甘盘、尹吉甫、管夷吾之类是也。时弗合，膏雨降，虽终日，贤哲生，虽比肩，旱苗之不救，百姓之弗赖，顔子、子思、孟軻、董仲舒之类也。故贤哲之生，自有时，百姓之赖其力，天也不赖其力，亦天也。呜呼！公佐之官，虽升于朝，虽刺于州，其出入始二年，道之不行，与居于田时，弗差也。公佐之贤，虽曰闻已其德行，未必昭昭然闻于天子。公佐是以不得其职，出刺一州，又短命道病死，天下之未蒙其德，固宜矣。然则天之生君也，授之以救人之道，不授之以救人之位，如膏雨之或雨於海，或雨於山，旱苗之不沐其泽者，均也。故君子不得其位以行其道者，命也。其亦有不足于心者耶？得其道者，穷居于野，非所谓屈冠冕而相天下，非所谓伸其何有不足于心者耶？

李文公集卷十三

卷十四

钦定四库全书

李文公集卷十四

唐 李翱 撰

唐故金紫光禄大夫尚书右仆射致仕上柱国弘农郡开国公食邑二千户赠司空杨公墓志铭

由杨喜追杀项羽以功封侯後数世生敞官至丞相敞曾孙宝不应王莽之命光武特徵老病不到宝生震诸儒谓之关西孔子位至大司徒太尉卒以忠死杨氏由是益大载於史传世不絶人曾祖珪辰州司户赠膳部员外郎大父冠俗奉先县尉赠吏部郎中父太清宋州单父县尉累赠至太保公讳於陵字达夫年十八举进士第选补润州句容主簿鄂岳观察使奏为判官转左骁卫兵曹累改评事监察御史历殿中得绯衣银鱼使迁江西公随之加侍御史著作郎及府除屏居建昌不至京师贞元八年徵拜膳部员外郎转考功知别头举转吏部员外郎及判南曹宰相之亲有以文书不足驳去者宰相召吏人诘之坚执不改遂以公为宣武吊祭使故事南曹郎未尝有出使者公既出宰相之亲由是判成矣故公卒不得在诏诰之清选遂为右司郎中郎官惰於宿直临直多以假免公白右丞右丞建立条例郎官不悦为作口语宰相有知其事者遽以公为吏部郎中改京兆少尹出为绛州刺史有言公弗当居外者德宗召见遂以为中书舍人其年知吏部选事时京兆尹李实有宠去不附己者故给事中许孟容为太常少卿而公改秘书少监德宗崩为太原幽镇等十道告哀使节将之遗并辞不受复命除华州刺史赐三品衣鱼所取宾僚皆一时名人後皆得显官有至宰相者其年冬迁浙江东道团练观察使越中大饥人至相食公奏请度支米三十万斛又乞余他道以赈救之民得生全入为户部侍郎未到改京兆尹奏请诸军诸使有犯罪者皆禁身推罪以状牒送本军又请属诸军诸使人置挟名勅五丁上者推两丁属军逋立节限以便於治诏皆可其奏京师称之复为户部侍郎人望益重金以公遂为宰相会考制举人樊直言策为第一中贵人大怒宰相有欲因而出之者由是为岭南节度使是时得考策者凡四人公既得岭南吏部员外郎韦贯之再贬巴州刺史而李益郑敬皆抵於患其在广州以韦词为节度判官任之以政改易侵人之事凡一十有七岭外之人至兹传道之节度使徐申以己俸薄月加三十万且曰後来所期共守公引常袞所奏勅皆罢之撤去蒲葵陶瓦覆屋遂无火灾民赖以安监军许遂振好货戾强而小人有阴附之者故遂振密表譖公直言韦词李翱惑乱军政於是除替罢归遂振既领後事捶撻吏人求公之非吏人大声呼曰杨尚书他方所遗尚不收去岂有侵用官钱乎遂振遽令取他方所遗及其至封印不启遂振慙而止宰相裴垍素未知公及遂振之譖遂以公为吏部侍郎重修甲勅用备奸源又於南曹更置别历以相检覆奏令选人纳直为出籤告以给之吏息奸欺官收羡钱公食丰絜廨宇以修迄兹守行遂为故事凡历四年补内外官三千余员皆当其分无怨诉者转兵部侍郎兼御史大夫判度支当淮西用兵漕挽供馈盐铁积欠官钱公与之廷辩高霞寓以唐邓之师攻蔡州怯懦不敢直进欲南抵申州出於空虚不守之地其

路险狭粮运难继公面於上前累言利害并以疏陈霞寓逗留之状请於北道直进足以援许汝之师贼势自蹙上许之霞寓深怨遂内外结构出为彬州刺史霞寓果败由是谈者知公之冤其为彬州躬勤於治不以卑远为薄明年召拜原王傅数日又为户部侍郎复知吏部选事元和十四年淄青平兼御史大夫以本官充东平宣慰处置使是时初诛李师道得兖州郓州等十二州列为三道刘悟既除滑州犹未出郓及公至悟出迎公促之悟即日遂发颁行赏赐皆得其实上甚悦谓宰臣曰杨某不易得及浙西观察使李修死上问宰臣崔羣皇甫鏐曰何不进浙西人名皇甫鏐知公方有恩惧作相遂言公所至皆有治绩以臣所见莫如杨某凡数百言上惟以一字应之曰惜人闻之者且以必为相矣是时裴门下既出太原崔中书为鏐所讚鏐又改尊号中上旨故鏐计竟行而公不相矣明年迁户部尚书又一年改太常卿又一年改东都留守兼兵部尚书御史大夫充畿汝都防御使既三年方将告休会以疾而罢乃叹曰年老致政本吾夙志兹则负吾平生心矣疾平迁捡校左仆射兼太子少傅或劝求分司以自便者公曰年至力惫便当乞骸骨於朝何用分司为遂西至京师朝谢讫不到中书遂还私家不判上案三上表乞自退诏迁左仆射致仕全给俸料数月上表固让乞就半俸许之庙享之外不复经过人家每佳辰体安则以子子孙僮侍游於园沼之中用以为适大和四年十二月癸亥以疾薨於新昌第享年七十有八天子为之废朝凡朝廷之贤设位而哭者不知几人册赠司空明年四月庚午归葬郑州荥泽县先太保之兆祔于夫人颍川韩氏赠华阴郡太夫人之莹夫人丞相少师休之孙丞相晋国公滉之女柔顺之德纪於前铭下从舅姑四十有三年矣子景复卫尉卿曰嗣复户部侍郎曰绍复举进士登宠词科曰师复未仕用文为业女适右司郎中韦公素孙承涣试大理评事鄜坊节度巡官承涣之下及在童稚者十有一人大卿侍郎以翱之受恩也久来请为志铭曰

公生六年太保弃捐未及成童虢国又终漂泊江湖谁食谁衣服习文学不劳於师爰始有名既于永归六十一年只慎德仪由直屡黜进无异词凡所临莅去而可思与之厚者莫匪隳材自我进者多遇良能恩建葭莩濡洽以财袒免缌麻亦尽其哀止足告归偃息丘园子胤孙童十有五人有列卿曹贵为侍郎禄秩且多膳饮馨香门吏诸生中外显光车马盈门岁时之良既壽既贵示终以常福荐攸归畴可比望为庙太祖百世蒸尝唐故福建等州都团练观察处置等使兼御史中丞赠右散骑常侍独孤公墓志铭

公讳朗字用晦当州刺史赠太子少保宪公之长子宪公有文章名於大历中每为文辄为後进所传写公生数岁而宪公歿与弟郁皆伯父母所养稍长好读书不烦於师年二十一与弟郁同来举进士其二年既得之矣会有司出赋题德宗不悦宰相喻使减人数故公与十余人皆黜公以伯父母无子即日归养于苏州使其弟留以卒业由是孝慈之名称於朋友间以处士起佐江西宣歙浙东三府得试校书协律郎元和九年拜右拾遗上疏请各令观察便充本道盐铁使场监之任悉归州县罢去管榷吏以除百姓之患十年盗杀宰相御史中丞伤以免公疏请贬京兆尹杀捕盗吏事皆不行君子壮之累奏时病有不合上意者贬为兴元府仓曹参军三年复徵入为监察御史改京兆府司録参军迁殿中寻加史馆修撰入省为都官员外郎修史如前出刺韶州复入虞部左司二员外得郎中数月迁权知谏议大夫敬宗御丹凤门大赦改元宦官殴伤鄂县令崔发於鸡竿下公疏请取其首为者杀之以正法宝历元年改御史中丞殿中王源植贬韶州司马公面谏其屈不得请凡五上疏自请罢去敬宗不许上即位

迁二部侍郎大和元年八月以为福建等州都团练观察等使兼御史中丞公疮发於背不克入谢病二旬九月壬子以疮卒年五十三天子为之废朝赠右散骑常侍有子孟常生九岁矣夫人京兆韦氏给事中贞伯之女未仕而夫人卒十月壬午其侄庠以公之丧归祔河南之壽安甘泉乡先公墓次以十月己酉窆铭曰

人之有生莫不皆死曰长曰短相望其几短不足伤长不足恃要归於尽孰有彼此公壽何迫百年中止丧车东去托骨山趾室无妻哭祭有稚子今名不忘曷其有已

故捡校工部员外郎任君墓志铭

君讳佶字叔正乐安人殿中侍御史玄植之孙灵府功曹日新之子君少遭父丧养母以孝称京兆尹崔光远表试左清道率府兵曹参军勅摄富平县尉知县事及克复京师以功授成都府犀浦县丞又以优授涇阳县尉会吐蕃犯都代宗幸陕州君召募吏人保守佛寺寇不敢逼擢为本县令充渭北十县团练使及驾还京为同列潜构功不得论仆射裴冕冤而奏之得长安县尉转本县丞历太府寺丞未几迁监察御史京畿馆驿使判官中书侍郎元载为潭漕使请为判官转殿中侍御史又捡校工部员外郎兼侍御史判官如故元载得罪君左授建州建安尉及杨炎入相君以书戒之由是杨怒而不用又移虔州司户再授信州司马观察使鲍鲂以为判官权知饶州事遭疾归卒於信州权窆於州西原有诗两卷前娶宗王氏女生男翼为邠州司法参军三女各为士妻後娶杜氏女生子三人曰淑曰美曰并女五人长女嫁长洲尉源咸季次女适权颖三女早卒少女二人未许嫁淑历佐大府以吏能有声为度支振武营田使得试协律郎摄监察御史元和十四年杜氏卒淑乃自信州奉府君之丧合葬于万年杨村从先人旧茔淑尝与翱同事岭南府翱知淑之才亟荐于时故淑来请志铭曰

士生于时兮所贵者才有才无命兮古今所哀噫

故处士侯君墓志

侯高字玄览上谷人少为道士学黄老链气保形之术居庐山号华阳居士每激发则为文达意其高处駸駸乎有汉魏之风性刚劲怀救物之略自齐周昌王陵所如固不合视贵善宦者如粪溲与平昌孟郊东野昌黎韩愈退之陇西李渤濬之河南独孤朗用晦陇西李翱习之相往来汴州乱兵士杀留後陆长源东取刘逸淮乃作吊汴州文投之大川以诉贞元十五年翱遇玄览於苏州出其词以示翱翱谓孟东野曰诚之至者必上通上帝闻之刘逸淮其将不久後数月而刘逸淮竟死其首章曰穹穹与厚厚兮乌愤予而不摅翱以为与屈原宋玉景差相上下自东方朔严忌皆不及也达奚抚为楚州起摄盱眙祭酒李公逊刺衢州请治信安其观察浙东又宰於剡三县皆有政不幸得心疾留其子狗儿於翱家而归庐山不到卒江西其子壻王适使佣吉勉求君所如值君卒吉勉以君丧殡于袁州之野而复於适适又死适之妻使吉勉来告於翱翱以狗儿归适妻居二年适妻又死狗儿尚童翱虑吉勉之短长不可期则君之丧终不坟矣故使吉勉往葬之而识其墓以示狗儿

叔氏墓志铭

元和九年岁直甲午正月十九日丁卯浙东道观察判官将仕郎试大理评事摄监察御史李翱奉其叔氏之丧葬於兹叔氏讳术生子曰王老远在京师翱实主其事铭曰

翱生始言叔氏弃没爰殡于野年周四甲岂无诸亲生故或迫亦有息子旅宦京国丘坟孰封松櫨未列殡宇零毁狐狸所穴中夜远思酸凄心骨是以乞假公府言来筮宅追念延陵丧子羸博葬不归吴於礼其合惟叔平生游居是邑夭谢于此灵幽其托女侄之西仲兄之北冥昭何异可用居息孰为故郷乃树松柏

李文公集卷十四

卷十五

钦定四库全书

李文公集卷十五

唐 李翱 撰

兵部侍郎赠工部尚书武公墓志铭

公讳儒衡字庭硕年二十四得进士第历四门助教故相郑公余庆尹河南奏授伊阙尉充水陆运判官及郑公守东都又请自佐得监察御史转殿中御史台奏其材诏即以为真历侍御史司封员外郎户部郎中迁谏议大夫三月以本官知制诰岁满转中书舍人二年迁礼部入谢赐三品衣鱼数月丁尊夫人忧再朞服除权知兵部侍郎月余母夫人暴卒公一号绝气久而乃息遂得重疾不能见亲友既祥益病长庆四年四月壬辰竟薨年五十六公气和貌严望之若神言不妄发与人有诚甫其相信不用约结每以时安危生民之病为己务从父兄元衡再为丞相以重厚名终始公实潜有补助其为谏议舍人每遇事不当必奏疏尽言皇甫鎛为相剥下以媚天子给边兵衣食以不可用物兵士或以火燔之其帅大哭将自刃者边几乱公累以疏言宪宗召问大悦踰月鎛竟罢度支及大行皇帝即位鎛遂斥死崖州其为兵部才数十日凡议论者潜曰武兵部必相矣盖上帝择日将相之而公以丧免有文集二十五卷制集二十卷曾大父载德颍川郡王左羽林将军大父平一愆后族之祸逃官於崧山中宗初徵拜起居舍人考功员外郎有文章传於当时父登常州江阴县令赠礼部侍郎夫人陇西李氏先公卒嗣子曰筹年十五次子年十三女二人长女许嫁卢立立良士为兴元节度司空晋公从事次女嫁前进士崔搏搏有学行其从父子浑以五月丙子奉公之丧归祔河南缙氏礼部先公之墓次公之先薨召其友礼部郎中李翱执臂以别且曰我将死凡家事细大皆有条画在文字矣平生志业於此穷矣公於我厚我死公其铭吾墓以传焉既十二日而公果歿君子以为知命及薨朋友之在位者皆请告泣哭以相吊其不识者亦望风以叹天子罢朝一日赠工部尚书筹尚幼哭泣几绝亲戚不忍闻其声其能奉遗命以终讫公意铭曰

武宗出周圣发之苗厥孙聘鲁乃列春秋秦汉之交曰臣王赵实大其家亭侯以绍厥支十七晋阳乃封子孙因家以及于唐神尧顺天鄴侯翼扶武烈谏酷五木成卢考公逃贵于嵩之下江阴洁白世嗣其雅德蘊位细庆丛于公惟公之兴罔不自躬言不苟出与人有诚名誉四延震荡厥声再罹大苦不堪以病先期告终恬以顺命毅毅武公是维硕人我哀刻识俾或可传

故歙州长史陇西李府君墓志铭

府君讳则字某凉武昭王十三世孙大父献眉州别驾时宰相有请婚者力不可止因去官居家弟遇病暴卒别驾烧一指以祷於神既而弟复生自说方就繁上帝有命以兄烧指宜复其生别驾生令一侍中源乾曜以子求婚府君拒之固以词抵之贬黔州彭水尉遂以壽终府君

始十余岁先夫人以之从丧归殡汝州由是依於舅族少好老子庄周之言与羣童游尽能记他童之所习先夫人学左氏春秋博该百家之书故府君以经史浸润力田供养由是少不肯求仕善草隶书弓矢博弈皆得其妙既冠得濠州定远尉假令他县令严而行吏急民寛富豪并贫民产而不税者尽以法治之贫民用安罢职复返其初从事岭南得试左武卫兵曹於福建得试太子通事舍人大理司直授歙州长史宣歙观察使请为判官奏未下以疾卒年七十四夫人河南元氏壽州刺史从之女年六十八先府君而终生子某子某皆未仕女子五人长女壻礼部员外郑锡次女壻桂州观察使杜式方次女壻京兆韦放次女壻荥阳郑循礼小女壻密县尉郑公瑜幼子克?少读书学文以兄举进士家事自饬弗克求名故年四十有六始奏授睦州司兵累迁试大理司直兼殿中侍御史充盐铁推官宝历三年三月克恭奉府君夫人之丧归葬於郑州某县冈原翱知克恭之材十二年矣故克恭以府君之葬来请且曰将以六月庚申窆知克恭者若吾季叔又安可以辞铭曰

德不称禄鬼神之责才优以贱古人不戚非道不求曷计人爵庆蘊而传後必有积其葬为谁孝子卜之着蔡金吉嘉原乃择合骨于兹终永其托何以识之有封有柏

故河南府司録参军卢君墓志铭

君讳士琮字德卿范阳人家世为甲姓祠部郎中融之长子明经及第历宁陵华阴二县主簿知泗州院事得协律郎郑少师之留守东都奏为推官得大理评事韩尚书代为留守请君如初尚书节将陈许奏充观察判官得监察御史府罢岁余除河南府户曹以疾免河南尹重其能奏为司録参军八月癸酉发疾而卒年六十九君少好着文精晓吏事少游故丞相杨炎张延赏之门杨美其文辞张每叹其吏材过人尝职同州当徵官税钱时民竞出粟易钱以归官斗至十八九君白刺史言状请倍估纳粟下以泽民上可以与官取利刺史诘状君辨其所以必然刺史行之民用得饶未一日果被有司牒和收官粟斗级六十後刺史到欲尽入其羡于官君既去职犹止之曰圣泽本以利民民户知之不可以独享刺史乃悬榜晓民使请余价因以绢布高给之民亦欢受州获羡钱六百万其为户曹决断精速曹不拥事及为司録始就官承符吏请曰前例某人等一十五人合钱二千僦人与司録养马敢请命因出状君诃曰汝试我耶使拽之将加杖承符吏衆进仰曰前司録皆然故敢请君告曰司録岂不自有手力钱也用此赃何为因叱出之召主僕吏约之曰司録判官文学参军皆同官环处以食精羶宜当一不合别无踵旧犯吾不恕及月终?吏率其余而分之文学参军得司録居三之一君晓之曰俸钱职田手力数既别官品矣此食钱之余不当计位高下从此後自司録至参军平分之旧事掾曹之下各请家僮一人食钱助本司府吏?附食司録家僮或三人或四人就公堂余食侵挠?吏弊日益长君使请家僮二人食钱於司録府吏?附食家僮终不入官?召诸县府望吏告曰某居此岁久官吏清浊侵病人者每闻之司録职当举非法往各白汝长宜慎守廉靖以澠池令为戒其所改易皆克己便人堪为故事及君卒士君子相吊哭咸以为能高而位卑不副有子三人孺方嗣宗嗣业号慕只守不失家法女二人前娶清河崔敏女无子後娶荥阳郑虬法女有子故皆祔葬於祠部莹东北孺方叩头泣曰丈人尝与先子同官而游宅居南北邻敢请纪石翱不得辞乃据所见闻者镌其实可推类以知凡所从事之贤铭曰

嗟卢君性直而用优约己以利人宜壽宜贵以拯时所艰其緘而不伸以丧厥神岂夺惠於东民悲夫

故怀州録事参军武氏妻傅氏墓志

年月日故怀州録事参军武氏妻傅氏卒於其兄弟之家越月日权葬于汴州某县某乡前此者武居官而卒傅氏有子曰俱儿俱儿奔父之丧未及返傅氏又卒俱儿奔父之丧孝道也傅氏卒于兄弟之家恋母也傅氏恋母其教施于子傅氏之歿不为朽矣

故朔方节度掌书记殿中侍御史昌黎韩君夫人京兆韦氏墓志铭

夫人姓京兆韦氏尚舍奉御说之次女也年十三执妇道於昌黎韩氏府君讳弇自後魏尚书令安定桓王六世生礼部郎中云卿礼部实生府君进士及第朔方节度请掌书记得秘书省校书郎累迁殿中侍御史贞元三年吐蕃乞盟诏朔方节度使即塞上与之盟宾客皆从其五月吐蕃不肯盟殿中君於是遇害时年三十有五夫人始年十有七矣有女子一人其生七月而孤夫人之母前既不幸矣夫人以其女子归于其父弗数年其父又不幸夫人泣血食贫养其子有道自慎於嫌节行愈高虽烈丈夫之志不如也犹有董氏伯姊继衣食仁之焉不数年董氏姊又不幸夫人於是天下无所归托矣殿中君从父弟愈孝友慈祥贞元十六年以其女子归於陇西李翱夫人从其女子依于李氏焉降年短命三十有二贞元十八年八月甲辰卒於汴州开封新里郷之某村其明年正月辛酉陇西李氏以其丧葬之於陈留县安丰郷冈原殿中君之先葬于河阳惟君之没不得其丧夫人是以不克葬於河阳而独坟于陈留弗克祔于殿中君之族而依于女子氏之党以从女子之怀权道也且将有待也殿中君文行甚修位甚卑没於王事初礼部君好立节义有大功於昭陵其文章出於时而官不甚高殿中君又无嗣尝闻诸君子曰位不称德者有後礼部君曷为然哉於是叙其孤女之悲以识於墓门铭曰

女子之生兮七月而孤所恃者母兮夫何辜天苍苍兮不回生几时兮终日哀

李文公集卷十五

卷十六

钦定四库全书

李文公集卷十六

唐 李翱 撰

祭吏部韩侍郎文

呜呼孔氏去远杨朱恣行孟轲拒之乃坏于成戎风混华异学魁横兄尝辨之孔道益明建武以还文卑质丧气萎体败剝剥不让俚花鬬叶颠倒相上及兄之为思动鬼神拨去其华得其本根开合怪骇驱涛涌云包刘越羸并武同殷六经之风絶而复新学者有归大变于文兄之仕官罔辞于艰疏奏辄斥去而复还升黜不改正言亟闻贞元十二兄在汴州我游自徐始得兄交视我无能待予以友讲文析道为益之厚二十九年不知其久兄以疾休我病卧室三来视我笑言穷日何荒不耕会之以一人心乐生皆恶言凶兄之在病则齐其终顺化以尽靡憾于中别我千万意如不穷临丧大号决裂肝胸老聃言壽死而不忘兄名之垂星斗之光我譔兄行下於太常声殫天地谁云不长丧车来东我刺庐江君命有严不见兄丧遣使尊罍百酸搅肠音容若在曷日而忘呜呼哀哉尚享

祭故福建独孤中丞文

维大和元年岁次丁未九月庚申朔二十日己卯朝散大夫守右谏议大夫知制诰李翱谨以清酌庶馐之奠敬祭於亡友故福建都团练观察处置等使兼御史中丞独孤君侍郎之灵呜呼昔我与君自少而欢中暂乖阻周荆眇縣宣城越中二府周旋同事於公职以相连子常推後我唱其先叔向汝齐不纫而坚兰馨以闻乃在掖垣引我代己真谓其贤共升於朝亦又多年或外或内莫余或捐君齿少我髮鬢都玄丰盈角犀气茂神全当臻上壽福祉昌延何为发瘍针药弗蠲有妻既丧有子童然丧祭谁主铭旌有翩呜呼哀哉惟短与长会归於死以存悲逝前後皆尔哭君之哀痛析支指欲抑不能纵之曷已呜呼哀哉入君之户但有裳帷思与君言不见容仪荐肉不食酌酒不持嗟嗟用晦何亟臻斯呜呼哀哉尚享

祭中书韦相公文

呜呼蘊德在躬必逢其庆利物之至宜乎得政君居翰林遭国之病建立诏制所颁未定决危疑於一言讨篡逆以从正横兵刃以森列述王心而革命伏羣情於顷刻咸属目以生敬既名遂而衆安乃登庸而辅圣壻因依之他路收爵赏之全柄升俊良之滯淹摧奸凶之炽盛何褊柔而中毅护勲贤於视听惟廷相之雍雍伊近世而畴并将协德以致理事有初而未竟方陈谋於帝前忽颠仆以终命虽稟受之有数亦生灵之不幸呜呼哀哉緬惟昔岁陪迹南宫省己何有辱交於公公贤偶时羽若飞鸿走斥於外困不能通公相未几遽归自东司谏左垣视草

禁中汲引之惠如帆得风飘沦八年颠白成翁幽蛰忽发涣然后蒙烈士感知矧惟贱躬间以存歿心悲曷穷奠爵而拜公其表衷呜呼尚飨

祭故东川卢大夫文

前此八年公在宣州翩归自南下江之流公发辟书使者来召言重礼至实宾之右内惧不称又安敢辞仰公之德自托如归亦既在门有言必信翩亦不贰知贤则进公曰汝言我用无疑每疑贤者患不能知汝正而公与我气合有怀必陈无谓弗纳公迁侍郎翩赴浙东宦途有阻困不能通公陈上前出白丞相保明无过昭灼有状事遂解释奏方成官非公之力其退于田公镇劔州翩作东掾亟言於相曷不以荐官罢在家卧病饮贫惟公见念复召为宾自修辟牒以复前好承命而行不憚远道余及陕郊闻公之丧失声泣哭若火煎肠公为大臣一心正直发言动听义形在色公出乎外衆论日归辅相之位实公所宜惟公之薨骨鲠道衰天下失望贤人共悲生必有尽自古皆尔歿而益光孰与公比丧车东去归祔先趾临路一号永诀於此呜呼哀哉尚飨

祭杨仆射文

呜呼贞元中岁公既为郎始获趋门仰公之光遂假荐言幽蛰用彰德惠之厚歿身敢忘公以直道于南出藩谬管记室日陪讨论旧政多糝如丝之棼与贤共谋秽涤榛燔监戎戾强阴附包奸潜潜疑危处之若闲并兼百流清浊终分宾主之义由兹益敦公自登朝及于谢政善接交友居官恪敬温然如春柔立不佞坐直屡退进匪由竞更历中外声华日盛咸期作相为国之庆宜而不居斯可云命知足告休颐养于家子为侍郎光曜芬葩亦列卿曹秩禄且多孙童满前园沼经过门吏盈朝宴赏有加宜哉万壽吉庆靡他弃此弗顾哀哉奈何呜呼哀哉身谁不贵有後斯荣惟公之嗣实大家声公为弗亡显显其名呜呼哀哉卜筮叶期返宅于荣翩复守郡居不敢宁追怀恩旧躬在郊垆承教絶绩刻扬德馨编服前导尽哀墓庭尚或监此公乎有灵呜呼哀哉尚飨

祭李宾客文

呜呼天地粹气降为哲人忠播大惠济於生民命与时违有此不伸责安所归乃在鬼神呜呼哀哉兄初有疾隶人来告走驷往视连呼不觉痛搅我肠谁其能疗嫂侄既至患亦微痊我时屡往笑语依然实希返初以及高年谪官分曹拜恩遄发负罪即路不遑去别意谓全德功当及人尚期会面复接欢忻如何一乖生死骤分呜呼哀哉岂虞濬之遂臻于兹舍我而去将安取?唯後与先能按几时长邪短邪终永同归死为尽乎将有所之唯尽唯有兄其已知呜呼哀哉兄之既疾告于妻子自古神圣莫不皆尔名垂不灭能光万祀生平交故歿後谁是吾友在东可以托死且吾所有往谓编纪吾名庶存乃贤在史临絶又告丁宁心耳所録既到酸惨启书披寻未穷漫漶盈裾生虽相好歿更有余敢辞厚命但恶空虚着兄之德刻石幽墟传乎万祀用显名誉呜呼哀哉兄丧东来我拘郡事□□□□棺不得视形存心游荡魄伤气一杯写情四望歔歔呜呼哀哉尚飨

祭硖州李使君文

於乎材不如君贵富者衆身丧远郡不逢世用如君之年存者则多而遽谢歿伤哉奈何官不展心壽不及老妻少子稚弃去何早我知子能一十八年力竟不及于兹已焉临君之丧洒酒以决刻石在圻名传讎灭下从先人万古之藏要归於尽安问短长呜呼哀哉尚飨

祭从祖弟秘书少监文

秘书少监十弟谅之之灵惟君文行修絜夙负嘉名累升科第士友懽接遂登諫省蔚以直闻周历南宮连刺三郡得风告罢入貳秘书致政于家息心养疾沉恙顿已日望其除告言不闻凶讞遄至於乎哀哉年未五十有男早亡少妻主丧有息非嗣报施之道冥茫孰知於乎哀哉吾责刺远州道里遐阔病不得见丧不得临痛悼摧伤凄贯心骨有酒在醢有肉在盘魂兮其来歆此单薄洒泪遣祭哀而不文孰期谅之去矣长别呜呼哀哉尚飨

祭刘巡官文

维元和七年岁次壬辰九月丙辰朔十五日庚午观察判官掇监察御史李翱等谨以清酌庶羞之奠致祭於刘君之灵我等与君同列宾筵共食偕行岁辰再迁公事多暇嬉游百般柳垂于塘荷秀于川或泛在水或登在山饮酒终夜觴觥往还笑言无虐咸尽于欢君实强盛时惟壮年宜哉壽考福祿来臻奈何遭疾鍼药弗痊日冀返初忧危遽传长路未极琴书忽捐呜呼哀哉堂有老母室有少妻幼男稚女或童或孩发声怨切吊者酸凄祔葬旧域随丧以归已矣刘君自古如斯有肉一豆有酒一卮我来一别去去长辞呜呼哀哉尚飨

祭钱巡官文

呜呼某维钱君絜行而文上第有司籍籍京秦退居于湖遭病且贫乃耀?词单使来臻中丞览之嗟叹盈辰遂驰官牒请列宾筵翩然而至灼灼有闻实司表奏章句出羣有时过我蕴积皆申无言不契有奥必陈每日仰公心知古人古人孰知幸聯为宾与我相接三十余旬不见有过潜然日新余有行□□郑之间书札日来道远情亲丁宁戒我已事亟还方将执手复展欢欣如何中道哀讞忽传惊呼失声迸泪流巾岂其相逢丹旆载翩少妻恸哭听者酸辛漫漫者天曲直谁贤梁冀张让富贵在身童乌项橐天枉其年王凤何得贾谊何慙将贵贱前定或短长偶然谁其司之施与何偏天不肯告使人惑焉临丧写哀备在斯言万事皆已一觴在前死矣奈何悲哉钱君

淮制祭伏波神文

呜呼伏波之生好兵自喜幼有壮节腾声出仕定册归汉谟俞帝旨筹无失画功伐可纪破斩徵侧实平交趾来往蛮谿未卒而死小人赤口曷本於理意苡南还明珠譖起乃收侯印爵不及子遗德不忘爱留杜里筑庙以祭人畏其鬼久而若新千岁不毁诘诘蚩蚩易白成緇孔子

义失勋华不慈曾氏杀人母投于机居窃厥嫂陈平不疑申生置堇晋有骊姬无极巧舌伍奢族夷孟子伤谗萋兮作诗公失其所梁松实为何独将军自昔如斯故土有历万代而不灭者常被讪于当时苟窥心而不作虽弃置其奚悲赫赫圣帝嘉贤命词酒罍既设神乎降思尚飡

祭中天王文代河南郑尹作

自春亢阳将害嘉谷是以斋心命使用祈于王惟神降歆明应如答阴云周布膏泽四施旱苗获生宿麦重秀臣人懽悦草木鲜荣惟王之功拯佑于下某忝尹京邑虑迫羣心实荷王化道以嘉祉方当月禁不杀羊牛谢王嘉锡曷敢稽留且荐中素非陈俎羞请俟踰月乃列牲牢

别灊山神文

维长庆三年十月二十七日朝议郎守尚书礼部郎中上轻车都尉李翱谨遣舒州摄要籍司衙前军虞候吴潭以清酒鹿脯告辞于灊山大神之灵翱自去岁来临此邦遭罹炎旱淮左毕同邻郡逃亡十家六空惟此舒人安业於农我政无能遭此岁凶灾同报异乃神之聪事幸无败誉斯有融遂忝帝命复官南宫皆神所佑我亦何功将赴京邑路沿大江遣使来辞神鉴予衷

於湖州别女足墓文

维长庆元年岁次辛丑十二月癸亥朔十九日辛巳父舒州刺史翱以酒果之奠敬别于第七女足娘子之灵吾以前月二十八日蒙恩改舒州刺史以明日将领汝母等水路赴州故以酒果来与汝别呜呼我为汝父汝则我女王命有期不得安处延陵丧子葬不归吴考之於礼其合矣夫汝之形骨托终此土汝之精神冥漠不覩上及於天下及於泉鬼神有知汝骨安全永永终古无有後艰我来诀别涕泪涟涟呜呼尚飡

李文公集卷十六

卷十七

钦定四库全书

李文公集卷十七

唐 李翱 撰

行已箴

人之爱我我度于义义则为朋否则为利人之恶我我思其由过宁不改否又何仇仇实生怨利实害德我如不思乃陷于惑内省不足愧形于顔中心无他曷畏多言惟咎在躬若市于黷慢遽自它匪汝之辱昔者君子惟礼是持自小及大曷莫从斯苟远于此其何不为事之在人昧者亦知迁焉及已则莫之思造次不戒祸焉可期书之在侧以为我师

陆惨槛铭

昼日居于是穷性命于是待宾客交其贤者亦于是有客曰翱铭于是

舒州新堂铭

先时寝坏有隘其庐乃作斯堂高严旗旗六桷四楹装重架虚栾拱不设檐蜚祛祛丽不越度俭而有余左立嘉亭繚以环除延延其深肆肆其纾吏事既退齐心以居思民之病择弊而鉏弗逸弗坠谨终犹初大旱之後邻邑成墟独我州氓乐哉胥胥鬼神所福事匪在予丞相以言乃下徵书复官于朝以解前疽刻铭於斯永示羣舒

泗州开元寺钟铭【并序】

维泗州开元寺遭罹水火漂焚之余僧澄观与其徒僧若干复旧室居作大钟贞元十五年厥功成於是陇西李翱书辞以纪之

八月梓人功既休戊寅大钟成先时厥初罹于天菑波沉火燔既浮为薪既蜚为尘澄观之功恢复其居革旧而新环墉如陵台殿斯严乃三其门俾後勿踰其徒不譁咸服其勤有加于初屋室既同乃范乃熔乃作大钟乃悬于楼以鼓其时以警淮夷非雷非霆铿号其声淮夷其惊上天下地弗震弗坠大音无斲千僧戮力愿昭其绩乃铭于石

江州南湖堤铭【并序】

长庆二年十二月江州刺史李君濬之截南陂筑堤三千五百尺高若干尺广若干尺以通四

乡之路蓄水为湖人得其赢正月既毕事舒州刺史李翱歌以记之辞曰天地作物功?不周贤人相之智与神侔潏潏南陂冬乾夏漉九江涨潮潜潜逆流东南百民城市所繇水积既深大波其?【匹尤切】亦有舟航覆溺之忧担拥叠路车轳其舟童婴涕堕老妇号愁历古建兹孰为氓筹濬之之来养民如身乃筑长堤距江之濒厚其钱佣以饱饿人南北东西百里鬬臻莫不用力千鎚响振【音贞】虓譟相励不督而勤堤既成止冈联突起坚若石城障为潏水蒲莞茭芡鸿鴈鰾鲤惟其所取或食或祀长堤坦坦植之杨槐架豁飞圯以便去来除险作利非贤不能歌示江人式悦汝怀

赵州石桥铭

九津九星横河中天下有道津梁通石穹隆兮与天终

解江灵

元和六年八月余自京还东暮宿在江涛水既平月高极明万物潜休远无微声坐至夜静目亦将瞑闻江中有如贾人相与言曰与子商游十有余年不识我愚托我如亲相得之欢百贾谁如泰山归後前盟顿渝我实不省子将何辞对曰噫承子後召子欲代予力虽不能志愿如初自昔及兹未尝汝薄利必以告害斯共度誓当结固永守终乐汝之责人惨若五刑小不顺汝亦何足听汝心好恶灼若天星动比孔丘其神且明异汝者斥谄汝者荣苟不汝随絶如诅盟人实难知尧所未易我虽受责敢丧前志荐汝利汝每忧不暨终何能成惟力所至岂不汝怨我道无二曰余虚言鬼神来弃汝实异兹翻然汝作疮疣生心洗刮不落巧避我长善探我恶短我如坠誉我如缚人或美我汝闪其目人或毁我汝盈其欲充汝之心饱汝之腹虽汝子孙亦所不足我实蒙顽为汝之辱动多尤悔赢败不畜汝既富厚享天百福筋骨坚强婢妾约綽财货积委屋室丰渥我从此去非曰道薄愿汝我忘无盛其毒言未訖余叱之曰人生若流其可久长须臾臭死譬若电光用心平虚天灵所臧得失是非其细如芒奚为交争此实不祥相欢不足其气已僵汝行吾言可以息兵於是言者叹息吐气掩鬱无语启户视之不见其处

数奇篇

禽滑厘问於子墨子曰鲁氏有叔侄同处者叔曰无恒侄曰数奇数奇强力能施俭以厚人凡鲁氏有大事父叔兄弟所不能集者数奇皆尽身以成之亲戚之丧在野者数奇皆往葬之姑姊妹之无主失时者数奇皆取而嫁之其或不能自存者数奇买田宅以生养之凡数奇之禄朋友故旧緦麻小功之亲无不皆周也仕于齐积功当迁辞不受请以与其叔无恒无恒因得官远近之亲莫不欢以赖之独无恒以为不足于己无恒有妾曰善佞畜私夫以生子曰不类数奇爱不类如其子无恒久乃告数奇曰不类非吾子他人之子也汝勿以为弟数奇惊曰叔父得无误乎无恒曰吾察之详矣有验存焉数奇之从父妹笑曰孰不知之虽然叔父之为人也无常心其後必悔悔则兄受谤为不仁而弃弟矣盍请契焉数奇以为然因质於无恒无恒遂裂帛具书其然之故与数奇以为信既而数奇仕於蜀无恒果复以不类为子爱之加於初数奇至固争之无恒大怒告人曰帛书非吾意数奇强我以为无恒恶数奇之不顺於己也毁

而敗之冀有惡名於時數奇終不怨其自行如初敢問為數奇者宜奈何而可子墨子曰數奇挈身而去可也問曰侄舍叔而去義乎子墨子曰有大故雖子去父可也叔侄何有古公欲立王季歷太伯仲雍知之遂適吳不返避嫡以成父志晉獻公信驪姬之讒將立奚齊太子申生不去終被惡名雉經而死且陷其父於惡公子重耳奔翟逃禍卒有晉國霸天下故重耳為孝而申生為恭無恒之惡數奇也深矣不去後必相殘陷無恒於大惡孰與去而皆全以追太伯仲雍重耳之迹而行乎雖子逃父可也問曰數奇可以不去而盡從無恒之所行耶曰不可從道不從父從義不從君況叔父乎無恒之所行無恒也如皆從之是陷無恒於惡數奇將何以立禽滑厘以子墨子告於數奇數奇遂適東夷東夷之俗大化

李文公集卷十七

卷十八

钦定四库全书

李文公集卷十八

唐 李翱 撰

来南录

元和三年十月翱既受岭南尚书公之命四年正月己丑自旌善弟以妻子上船於漕乙未去东都韩退之石潯川假舟送予明日及故洛东吊孟东野遂以东野行潯川以妻疾自漕口先归黄昏到景云山居诘朝登上方南望嵩山题姓名记别既食韩孟别予西归戊戌予病寒饮葱酒以解表暮宿于巩庚子出洛下河止汴梁口遂泛汴流通河于淮辛丑及河阴乙巳次汴州疾又加召医察脉使人入卢又二月丁未朔宿陈留戊申庄人自卢又来宿雍丘乙酉次宋州疾渐瘳壬子至永城甲寅至埇口丙辰次泗州见刺史假舟转淮上河如扬州庚申下汴渠入淮风帆及吁?风逆天黑色波水激顺潮入新浦壬戌至楚州丁卯至扬州戊辰上栖灵浮图辛未济大江至润州戊辰至常州壬午至苏州癸未如虎丘之山息足千人石窥劔池宿望梅楼观走砌石将游报恩水涸舟不通无马道不果游乙酉济松江丁亥官艘隙水溺舟败戊子至杭州己丑如武林之山【即灵隐天竺寺】临曲波观轮 登石桥宿高亭晨望平湖孤山江涛穷竹道上新堂周眺羣峰听松风召灵山永吟叫猿山童学反舌声癸巳驾涛江逆波至富春丙申七里滩至睦州庚子上杨盈川亭辛丑至衢州以妻疾止行居开元佛寺临江亭後三月丁未朔翱在衢州甲子女某生四月丙子朔翱在衢州与侯高宿石桥丙戌去衢州戊子自常山上岭至玉山庚寅至信州甲午望君阳山怪峰直耸似华山丙申上於越亭己亥直渡担石湖辛丑至洪州遇岭南使游徐孺亭看荷华五月壬子至吉州壬戌至虔州己丑与韩泰安平渡江游灵应山居辛未上大庾岭明日至浚昌癸酉上灵屯西岭见韶石甲戌宿灵鹫山居六月乙亥朔至韶州丙子至始兴公室戊寅入东?山看大竹笋如婴儿过浚阳峡己卯宿清远峡山癸未至广州自东京至广州水道出衢信七千六百里出上元西江七千一百有三十里自洛川下黄河汴梁过淮至淮陰一千八百有三十里顺流自淮阴至邵伯三百有五十里逆流自邵伯至江九十里自润州至杭州八百里渠有高下水皆不流自杭州至常山六百九十有五里逆流多惊滩以竹索引船乃可上自常山至玉山八十里陆道谓之玉山岭自玉山至湖七百有一十里顺流谓之高溪自湖至洪州一百有一十八里逆流自洪州至大庾岭一千有八百里逆流谓之漳江自大庾岭至浚昌一百有一十里陆道谓之大庾岭自浚昌至广州九百有四十里顺流谓之浚江出韶州谓之韶江

题桃榔亭

翱与监察御史韦君词皆自东京如岭南水道仅八千里翱以正月十八日上舟于漕以行韦君期以二月策马疾驱追我于汴宋之郊或不能及约自宣城会我于常州以偕行既翱停舟

宿留日以须韦君之出洛也易期又宣城谋疾到逆江南流上翱以妻疾居信安四十余日比及江西韦君亦前行矣上桃榔亭见韦君纪姓名且有念我之言嗟夫皆行八千里先後之不齐也不过十日而初谋竟乖人事之不果不可以前期也

题峡山寺

翱为儿童时闻山游者说峡山寺难为俦远地尝以为无因能来及兹获游周历五峰然後知峡山之名有以然也於灵鹫寺时述诸山居之所长而未言其所不足如虎丘之劔池不流天竺之石桥下无泉麓山之力不副天奇灵鹫拥前山不可视远峡山亦少平地泉出山无所潭乃知物之全能难也况求友择人而欲责全耶去其所阙用其所长则大小之材无遗致天下於治平也弗难矣

题灵鹫寺

凡山居以怪石奇峰走泉深潭老木嘉草新花视远为幽自江之南而多好山居之所翱之对者七焉皆天下山居之尤者也苏州有虎丘山则外惟平地入然後上高石可居数百人劔池上峭壁耸立凭楼檻以远望

五木经【元革注】

檇蒲五木玄白判【檇蒲古戏其投有五故自呼为五木以木为之因谓之木今则以牙角尚饰也判半也合其五投并上玄下白故曰玄白判】厥二作雉【雉鸟也取二投于白上刻为鸟】背雉作牛【其刻其鸟二投背上并刻牛故曰背也以雉犊为彩者谓其悍戾逢敌必鬪以求胜也虽矢马关亦皆角逐防遏之义也】王采四卢白雉牛【王贵也】毗采六开塞塔秃擲【毗贱也其采义未详】全为王驳为毗【全谓其不杂也】皆玄曰卢厥策十六【庐黑白色书曰旅弓旅矢谓所投尽黑也十六策者行马时便以此数矢而隔之他策仿此】皆白曰白厥策八雉二玄三曰雉厥策十四牛三白三曰犊厥策十雉一牛二白三曰开厥策十二雉如开【如开各一】厥余皆玄曰塞厥?十一雉白各二玄一曰塔厥?五牛玄各二白一曰秃厥策四白三玄二曰擲厥策三白二玄三曰 厥策二矢百有二十设关二间矢为三【间别也刻木为关雕饰之每聚四十矢】马策二十厥色五【大率戏时不过五人五色者各辨其所执也】凡擊马及王采皆又投【擊马谓打敌人子也打子得雉王采自专故皆许重擲王采累得累擲之变则止】马出初关叠行【谓逢可以叠马即许叠也如不要叠亦得重马被打着尤苦】非王采不出关不越坑【马出关亦自专之义也名为落坑义在难出故用王采能出也】入坑有谪【其所罚随所约并输合坐】行不择策马一矢为坑【谓矢行致马落坑也亦有马皆不可均融数奇而入坑者所睹随临时所约刘毅家无儋石储而一擲百万也】

韦氏月録序

人之所重者义与生也成义者莫如行存生者在於养所以为养者资於用用足而生不养者多矣用不足而能养其生者天下无之养生之物禁忌之术散在杂方虽有力者欲行之而患不能备知杜陵韦行?博学多艺能通易传论语老聃庄周之书皆极师法穷览百家之方撮而集之成两轴各附於本月阅之者简而详以授於余且曰齐人【唐讳民故曰人】要术传行寡验行?集此书经试验者然後摭取实可以有益於养生若执事序而名之则所谓无翼而能飞者必传於天下矣余因号之为月録

何首乌録

僧文象好养生术元和七年三月十八日朝茅山遇老人於华阳洞口告僧曰汝有仙相吾授汝秘方有何首乌者顺州南河县人祖能嗣本名田儿天生阉嗜酒年五十八因醉夜归卧野中及醒见田中有藤两本相远三尺苗蔓相交久乃解解合三四心异之遂掘根持问村野人无能名曝而乾之有乡人变良戏而曰汝阉也汝老无子此藤异而後以合其神药汝盍饵之田儿乃筛末酒服经七宿忽思人道累旬力?健慾不制遂娶寡妇曾氏田儿因常饵之加飧两钱七百余日旧疾皆愈反有少容遂生男乡人异之十年生数男俱号为药告田儿曰此交藤也服之可壽百六十岁而古方本草不载吾传於师亦得之於南河吾服之遂有子吾本好静以此药害於静因絶不服女偶饵之乃天幸因为田儿尽记其功而改田儿名能嗣焉嗣年百六十岁乃卒男女一十九人子庭服亦年百六十岁男女三十人子首乌服之年百三十岁男女二十一人安期叙交藤云交藤味甘温无毒主五痔腰腹中宿疾冷气长筋益精令人多子能食益气力长肤延年一名野苗一名交茎一名夜合一名地精一名桃柳藤生顺州南河县田中岭南诸州往往有之其苗大如木藁光泽形如桃柳叶其背偏独单皆生不相对有雌雄雄者苗色黄白雌者黄赤其生相远夜则苗蔓交或隐化不见春末夏中初秋三时候晴明日兼雌雄采之烈日曝乾散服酒下良采时尽其根勿洗乘润以布帛拭去泥土勿损皮密器贮之每月再曝凡服偶日二四六八日是服讫以衣覆汗出导引尤忌猪羊肉血老人言讫遂别去其行如疾风浙东知院殿中孟侍御识何首乌尝饵其药言其功如所传出宾州牛头山苗如葶藶蔓生根如杯拳削去侧皮生啖之南人因呼为何首乌焉元和八年八月録0习之凉武昭王裔也贞元间进士调校书郎知制诰终为山南东道节度使捡校户部尚书其性鲠介喜为危言仕不得显从昌黎公游与皇甫持正并推当时叶石林评其文词高古可追配韩苏舜钦评其理过於柳总集凡十有八卷共一百三首皆杂着无歌诗今逸其疏引见待制官及欧阳詹传二首惜无从考迺来抄本末附戏赠诗一篇云县君好塽渠绕水恣行游鄙性乐疎野凿池便成沟两?植芳草中央漾清流所尚既不同塽凿各自修从他後人见境趣谁为幽鄙拙之甚又传灯録载其赠药山僧一篇云链得身形似鷓形千秋松下两函经我来欲问西来意云在青天水在瓶风味亦不相类又韩文公远游联句亦载一联云前之诘灼灼此去信悠悠其诗句仅见此耳或病其不长于作诗信哉湖南毛晋识

李文公集卷十八